

# *MUDIMU MWOWELA BYANZA*

## *MUMANYÌSHÌÌBWÈ WÀ NZAMBI*

 Twasàkidila, wa manza têntè, mwanèètù. Billy mmuswè bwà ngàmbè ne ewu mmusangu wànyì wà kumpàla mu cyambilu, kacya kùkaadi ngondo yisàtù. Nènku yéyè... Ndi mvùluka musangu wà kumpàla wûngààkamujuulà, bwà kufilayè bujaadiki, kwambayè ne: "Cintu cyà kumpàla, ndi ne bwôwà." Nànscha mêmè pànyì, ndi ne bwôwà. Bidimu bitwè ku makùmi àsàtù ne bïtaanu mu mudimu wà bwambi, ne eci ki cikondo citàmbe bule cïndiku mushiyè cyambilu bwà kacya ngâbwela mu mudimu wà bwambi. Bïvwa bïnkëngela ndambù wa diikisha, ki ne mêmè ne Mwanèètù Mosley, ne bamwè bàà ku bânà bëètù bàà balûme kaaba aka, tuvwa bayè mu kaalwendu kakesè kàà bulembi. Kàdi tudi biikìshekù mpindyewu. Ne edi ndisangisha dyànyì dyà kumpàla kacya ànu mêmè... bu ku ditùkù dyà kumpàla dyà ngondo wa citèèmà nànku awu. Nènku ncintu... mudimu wà bwambi ncintu cidi cikèngela wêwè kushààla naacì.

<sup>2</sup> Nènku ngäbàlòmbu bwà bìmanyikèku dìkàpàkapà dyàdyà, anyì kumònà ní mbafwànyinekù kudiìmanyika, bwalu ndi mumanyè ne mbikolè bwà kuumvwa. Ne mbikolè, ndi mumanyè, pàdì muntu ùfila bujaadiki bwèndè. Bïvwa binkolèle bwà mêmè kuumumvwà's. Nudikù mwà kuumvwa bïmpè bwà mpindyewu anyì? Bïmpè. Ndi mumanyè ne bikèngela ngimanyina pabwîpì ne cikòlokolo eci too ne pàlongololàbo cyàcyà nàka.

<sup>3</sup> Neyà bushùwà ne edi ndyèsè di—dinènè bwànyì mêmè, ne ndi—ndi bulelèlè ne kusàkidila kùdì mulombodi wa cibìlù, ne kùdì dyàpà dyà Beena Kantu-ku-byanza bàà Èvànjeeliyò mu Kaabujimà bàà mùneemu mu Yuma, ne bwà bambi bônsò. Bimbi balenga bàà misambu aba, bàvwà babànde kaaba aka ànu mu katancì kakesè aka abu, ndi njinga kubâtèèlejakù ku—ku disangisha. Bïvwa bïmpè byà kacya. Mvwa—mvwa ànu ndìkonka, pàvwàbò bimba apu, Yone ní ùvwakù mummòne. Kàdi ndi ntèkemena ne ùvwva mummòne. Ne, pa nànku, ndi ngumvwa ne nudi mu ditàbuluja kaaba aka. Mukalenge àtambè kunùbènesha, mwanèètù wa balùmè ne mwanèètù wa bakàjì, panùdì nuyiisha apu. Ne kùdì balundà bànyì bônsò bàà mu Phoenix ne mu myaba mishìlèshìllangàne, mbwena kwamba ne... ne bàà mu Californie mwàmwa.

<sup>4</sup> Nènku ndi muswè kwambakù ànu mwakù kampànda bwà mâtàaa. Pângààkàfikà kùdì beena Mpenta, mvwa... ngâkenza dilabula dyà mpenta, nciyikù mumanyè ne kùvwa èkèleeliziyà pèndè ne ngwa beena Mpenta to. Mvwa Baptiste Missionnaire

ciinè cikondo aci. Mvwa mupete dibàtiiza dyà Nyumà Mwîmpè, ki mêmè kujandula ne kùvwa bàmwè bantu bàvwa biitâbùùje cintu cìmwècìmwè cînmvwà mupetè aci. Kàdi bôbò bàkaavwa bacipetè bidimu makùmi ànaayi kumpàla kwà mêmè kucipeta. Pa nànku mvwa ànu, mwàkambà Pôlò, ngeela meeji, ncìyi nteeta bwà kumutentula to, kàdi mu mùshindù kampànda “muntu mulela cikondo cimanè kupità.” Kàdi... Bânà bètù bàvwa bôbò bàmwèka bu bàvwa bëèla meeji ne mvwa mupàmbùke, mulalùka ànu menemenebu, mutuyakwam’amu’s. Kàdi mvwa—mvwa mumanyè ne mvwa mupetè cintu kampànda. Dîbà adi, dilabula dyànyì dìvwa menemene ànu mwàkadipetàbo kwàka amu. Nènku ki mùshindù awu wûndì mêmè munangè cyôcì aci.

<sup>5</sup> Nènku, kàdi pângààkalwà munkaci mwàbò, ci—citùpà cìvvà cìpandà mwoyi pa bwalu abu ncyà ne, ngâkasangana ne bàvwa batàpùlùke, mu màngumba mashìllèshìllàngànè, ànu mùvvà èkèleeyiyà wanyì wa ba-Baptistes amu. Nènku bôbò... Pàànyì’s mvwa ndyàmbidila ne kùvwa ànu umwèpelè wa ùbìlkidiibwa ne m’Mpenta, kwàjiki. Kàdi, mêmè kulwa kujandula ne, kùvwa màngumba àbò bûngì cyanàànà mashìllèshìllàngànè. Pa nànku, mêmè... ônsò awu àvwa ànu mîmpè. Ndi mumanyèku bàmwè bàà ku bantu bàà batàmbe bwîmpè bânkààdiku pàànyì mutwilàngànè naabò, kacya bändela, bàvvà mu biinè bisumbù ebi. Ne bàvwa—bàvwa, mu bushùwà bwà bwalu, màngumba mashìllèshìllàngànè. Kàdi àànyì—àànyì meeji ôwò àvwa ne bìvwa bìkèngela twêtù kwikalala umwe mu mwoyi, biikàle ne Kilistò, nènku ncyàkashààlakù wa mu dìngumba kampànda dyà ku wôwò awu nànsha. Mêmè kushààla ànu pankaci pààbò, ne nditacisha bwà kukwàta byanza byônsò bibidì, ne byanza byônsò, ne kwamba ne: “Tudi bânà bàà muntu.” Katwèna... Tudi bafwànyìnè kumònà tuntu tukesè bishìllàngana, muntu ne mukwèndè. Kàdi, pa kuumusha ànu biinè byônsò abi, s’tudi ànu bânà bàà muntu, bwalu tudi balediibwe ku Nyumà umwèùmwè awu. Tudi dîkù dyà Nzambi.

<sup>6</sup> Pashiishe pàdì beena Kilistò bàà kantu-ku-byanza, Beena Kantu-ku-byanza bàà Èvànjeeliyò mu Kaabujimà abu, dyâpà edi, mvwa munkaci mwà masangisha àà kumpàla ne Mwanèétù Shakarian. Mvwa mumumanyè kumpàla kwà kwikalakù bulongolodi abu, anyì kwà ndongolwelu awu kutèkiibwayè. Mvwa ndyàmbidila ne cìvwa ncintu cinène. Ne ncilwè ciibi cyunzulula bwànyì mêmè, bwà kwenza ngendu mu buloba bujimà ne Beena Kantu-ku-byanza bàà Èvànjeeliyò mu Kaabujimà aba.

<sup>7</sup> Mwinè amu, misangu mikwàbò, nudi nusangana kasùmbù kàà bambi, mîngà misangu, biikàle ne njiyà kampànda mikesè mibì bwà kasùmbù kakwàbò, bwalu muntu kampànda mmwambè cintu kampànda. Aci kí mmyaba yônsò to, kàdi tudi tucisangana mu yìmwè myaba. Nènku cileejilu, èkèleeyiyà

kampànda yéyè mucìtùùdile mfrangà, mukwàbò awu yéyè kààkwikala ne cyà dyenzàmu to.

<sup>8</sup> Kàdi ne Beena Kantu-ku-byanza bàà Èvànjeelìyò mu Kaabujimà, ncilwè ciibi cyunzulula bwànyì mêmè. Pàdìbo bàbwela, dìbà adi mêmè ndi nkùngwijà bânà bètù bônsò pàmwè, nènku tudikù—tudikù mwà kuswikakana; pàmwäpa bampaasatà bàbidi bafwànyine kwikala ne njiyà kampànda, anyì cintu kampànda. Eci ncilwè ciibi cyunzulula cinènè, ne ndi mwenzè ngendu yà buloba bujimà bwàbò bôbò kùkaadi bidimu mpidyewu, ngenda ngààkula mu mâtà àbò.

<sup>9</sup> Nènku mêmè... Yuma kí ncimenga cinène menemene to, nàンsha mûndì ndicinkila ne ncinène menemene kutàmba cîndì mufùmìne aci, Jeffersonville, mu Indiana. Kàdi ndi mutwilàngàne ne mulombodi wenù mûneemu. Kùdì... yéyè ùvwa... ne bakwàbò bashiilèshìllàngàne bàà mu dyapà dyenù. Nènku ngeela meeji ne nudi ne mpungà mulenga wa dikèma mwab'ewu.

<sup>10</sup> Mvwa ànu ngeela meeji, dilòòlò edi, pâmvwà musòmbe mwab'ewu mutàngile bantu apu. Nudi bamanyè's, àbidi adi pansiò aa netùjimijè dyêse edi. Nsangilu wa Maèkèleeyìya wa Buloba bujimà neàtùminè. Ndi ndicinkidila ne citùpà citàmbe bunène cyà batèeleji bàànyì dilòòlò edi ncyenza ne beena Mpenta, ne ba-Baptistes, ne—ne beena Église de Dieu, ne aba bâdì pambèlu pàà Nsangilu wa Maèkèleeyìya wa Buloba bujimà awu. Ne—ne bôbò, ànu aci menemene ki mayélè àdibo benzè, ne ki cîdì Bible mwambè ne nebénzè ncyôci aci. Kàdi twêtù tudi badimwijibwe bwà cyôci aci, pa nàンku tushaalàayì kule naaci. Nènku ànu mùvvwàbo bàmba dilòòlò edi pa, mu musambu amu, pa bìdì bítàngilà Dilwa dyà Mukalenge dìdì pabwípi edi, dìdì mwà kwikala pabwípi kutàmba mutùdì twêtù twela meeji ne mmùdidi amu.

<sup>11</sup> Ne ndi ngeela meeji ne mpatùdì mwà kudìsanga pàmwè mu bwoùmwè bwà mùshindù ewu ebu, cîdì cîtewenzelakù cintu kampànda, cîdì citàmbe kutùseemeja pabwípi muntu ne mukwèndè. Nènku patùdì tutàmba kuseemena pabwípi muntu ne mukwèndè apu, tudi kàbidi tutàmba kuseemena pabwípi ne Nzambi, bwalu Yesù wàkamba ne: "Mu mùshindù wunùdì benzèlè bakesè bàà ku bapwekèlè Bâànyì aba awu, Mêmè ngnùndì benzèlè awu."

<sup>12</sup> Ndi ne mwânà mukesè wa balùme kaaba aka mu mwaba kampànda, ngeela meeji, Joseph. Ndi ne Billy musòmbe kaaba aka. Bânà bàà bakèjì bàbidi basòmbe lwa paanyimà pààpa, ne mukàjàànyì. Mpindyewu bu ne muntu ùvwa ne cintu kampànda civwà... cyûvwàku ujinga kwenza cyà cilenga menemene, ndi ntàmba kujinga úcyènzèlà bânà bàànyì pamutù pàà kucingenzela mêmè. Ne pa nàンku ndi ndyùmvwa pàmwäpa ne, mêmè bu muledi, ne Yéyè ki mpokolo wa buledi, ngeela

meeji ne mùshindù awu ngùdì Nzambì ùdyùmvwa. Bu byôbì bìkèngela bwà twétù... Tudi tuMukwàcila Yéyè mudimu patùdì tukwàcilangana mudimu muntu ne mukwèndè apu. Ki mutùdì tukwàcila Nzambì mudimu nànku.

<sup>13</sup> Ne bu mündì mumanyè ne eci mbulelèlè, díbà adi ndi ngeela meeji ne musangu wônsò wùdì dyâpà edi ditwìlangana, bu mùdìbi ne ndiimàne pankaci pàà butangadiki... Ncyà bushùwà ne kakwèna dilongesha kampànda dìdì Beena Kantuku-byanza bàà Èvànjeeliyò mu Kaabujimà båtwa nyama ku mikòlò to. Bôbò bådi båtwa nyama ku mikòlò ànu Èvànjeeliyò mu kaabujimà. Kàdi muntu yêyè úpangakana, abi's bidi ànu bîmpè menemene. Bidi ànu bîmpè. Tudi ne bwobùmwè, nànsha bishi. Pa nànku ndi ngeela meeji ne ncifwànyìne kwikala... Bu ne mvwa musòmbèle mùneemu mu cimenga eci, ngeela meeji, pàdì dyâpà adi ditwìlangàna, bu ne kùvwakù mpùngà kampànda wa byenzekakù, mvwa mufwànyìne kwikalamù ne kufikishamù muntu yônsò úmvwàku mwà kufikishamu awu. Ncyà bushùwà, bwalu ncintu cidi—cidi citupèèsha dikàndà pàmwè.

<sup>14</sup> Mêmè ntu musòmbèle mu Tucson, ne ntu ànu ngààkula ku misangu ne ku misangu mu dyâpà adi, díbà dyônsò. Ne mu Phoenix, kacya ànu mmwangala nya ku Arizona, ntu mu Phoenix musangu wônsò wûntù mpeta mpùngà wa kuya ku—ku Phoenix, bwalu... ne nteetà bwà kulwakù ne muntu kampànda, kubiikila muntu kampànda, kwangata bakwàbò bambi.

Ne bådi mwa kwamba ne: “Èè, èè, udi umònà’s, Mwanèètù Branham, twétù katwèna.”

<sup>15</sup> Mêmè ne: “Nànsha wêwè... Lwâ tuye ànu ne mêmè. Ndà bu—bu mulundà, pàmwè naanyì.”

<sup>16</sup> Nènku ndi ànu mbàfikishakù bwà katancì kakesè cyanàànà. Ki cyônsò cidi cikèngelà bwà wêwè kwenza. Ne bådi båjandule ne, mwoyi wa muntu yônsò wùdi ne nzala yà bwobùmwè. Nènku bìvwa bìkèngela bwà twétù kwikalala twenza mûshindù awu. Ncimanyinu cinène cyà cikondo cyà nshiïkidilu. Nzambì àbèneshèku dyâpà edi. Dishaalèku—dishaalèku too ne pààlwà Mukalenge Yesù bwà kutwàngata mu Butùmbi, ki disambila dyànyì ndyôdì adi.

<sup>17</sup> Mpindyewu, ndi mvùluka lwendo lwànyì lwà kumpàlè lwà kupìcila mu Yuma. Mvwa mu kàshinyì kàà Ford kàà Modèle-T kavwà mwà kwenza ntàntà wa kilômètè makùmi ànaayi ne mwandamukùlù ku díbà dìmwè. Mvwa ngeela meeji pâmvwà ndwa mu kàshinyì leelù ewu apu. Mucikàle ànu ne lulamatu ku Ford; ki úncicidi nende, ne ncitukù mupetà àà mushindu mukwàbo to ànu yêyè awu. Kàdi mêmè... Mpindyewu mêmè ncitu mpàànyisha tûshinyì twà Ford to. Mpindyewu, aci ki ndìswishà dyà yêyè awu to. Nwamònù anyì? Kàdi ndi mvùluka mùvvà Ford... Bâàbûngì bàà kunùdì nwénù bâna bëètù bàà mulongo wànyì mbavùlùke Modèle T wà kale awu. Mùvvwa

mmu cidimu cyà 1927. Bivwa bìkukèngela bwà ùtangilè bìmpè menemene cyanàànà kùvwa mwà kumònà Yuma to pèèbè upicilamù. Kàvwa kakesè be, kàdi nukààdi bavulàngànè cyà bushùwà. Kàdi, mùshindù wûmvwa ngenza kilòmèètà makùmi ànaayi ne mwandamukùlù ne Ford wanyì awu, ùvwa wènza kilòmèètà makùmi àbìdì ne yìnaayi ku dìbà mu *nunku*, makùmi àbìdì ne yìnaayi mu *naka*. Nànkù, nyìsangisha, mpeta makùmi ànaayi ne mwandamukùlù ku dìbà dìmwè, ne bikùnàkùnà byànyì byônsò abi ne bikwàbò. Yuma wälàbàdì.

<sup>18</sup> Èkèleeziyà wa butùmbi ewu, utùdì, tudi—tudi tulwangana bwà Diitabuuja dilenga dyà dikèma edi.

<sup>19</sup> Twasàkidila, mwanèètù, wenjì nànkù awu.

<sup>20</sup> Wälàbàdì pèndè, nènku tudi ne kusàkidila bwà bwalu abu. Mukalenge ànùbènèshèku bônsò.

<sup>21</sup> Tudi tutèkemena ne, nwènù mu nyùngulukilu emu, pabwîpi apa, dyônsò dyà ku masangisha aa adi... Ndi ne—ne dyâpà mu Phoenix, bwà kwakulamù, mu dyàlumingu dìlwälwà edi. Ne dyàlumingu yàlondà ku Flagstaff. Ne dìmwè dyàlondà, dyà matùkù makùmi àbìdì ne dìmwè adi, nekwikalè didyà dinène mu Tucson. Nwènù bônsò nudi babìikidìlbwè.

<sup>22</sup> Nènku, bu Mukalenge mwà kwanyisha, ndi muswè kwakula ku cibambalu cyà bibilù cyà ku Cilààla-beenyi cyà Westward Ho, ngeela meeji. Ndilòòlò kaayì dìdici cibanga? [Muntu kampànda ùdi wàmبا ne: "Mmu dyàlumingu mu mapingaja, dyà matùkù dikùmi ne mwandamutekète."—Muf.] Mu dyàlumingu mu mapingaja, mu matùkù dikùmi ne mwandamutekète, kaadisangisha kakesè kàà butangadiki. Ndi ntèkemena ne bimbi bàà misambu aba nebììkalèku, pabwîpi ne cikondo aci, bwà kutùkwàcisha. Nènku netwìkalèku dìbà adi too ne ku diisâtù. Ngeela meeji ne mmu dyàlumingu mu mapingaja. Ne tudi twenza nànkù bwalu katwàkucyàmakanakù nànscha umwe wa ku ndongamu yà maèkèleeziyà to. Pashìishe, mu dìmwè ne mu diibidì, ne pashìishe mu diisâtù tudi ku Ra...ku West...ku Ramada Inn, Ramada Inn. Nènku pashìishe mu diinâyì netùbangilè ku Westward Ho. Mmwômò anyì?

<sup>23</sup> [Mwanèètù wa balùme kampànda ùdi wàmبا ne: "Westward Ho, mu dyàlumingu, mu dìmwè, mu diibidì. Pashìishe tuyà ku Ramada Inn, mu diisâtù, ne tudi tushààlakù too ne ku mpungilu."—Muf.] Mpungilù ùdi ùjika, ku Ramada Inn. Pa nànkù netwìkalè ne disànska dyà kwikalakù neenù dìbà kanà dyônsò.

<sup>24</sup> Mpindyewu, kumpàlà kwà twêtù kukùdimukila ku Mukàndà ewu, twänjì twinyikààyikù mitù yètù bwà katancì kakesè cyanàànà bwà kwakula ne Mwenawù.

<sup>25</sup> Mpindyewu, ne mitù yètù miinyika ku lupwishi kùvvà Nzambi mutwângàte, nènku, bu Yesù mwà kunènga, bidi bìkèngela bwà twêtù kwalukila mùshindù awu dìngà ditükù.

Kacya ànu ngâfika kaaba aka, ndi mupetà mukenji wà ku esètè, ne inábànzà mutekète ûmvwa mumanyè... Yéyè mmwâna mukesè wa bakàjì dyèndè ng'Edith Wright. Mmusabùke muyè katwìlangana ne Nzambì, mu mapingaja emu, pa díbà isàtù jaajaaja. Bidi bìkèngela bwà twêtù kwalukila. Kwôkò muntu kaaba aka udi muswè bwà bàmuvùlùkè mu disambila, swàku wélè ànu cyanza cyèbè muulu kùdì Nzambì. Nzambì àkubènèshè.

<sup>26</sup> Taatù wa mu Dyulu, bu mutùdì basànkìle bikolè bwobùmwè bulenga ebu, twimba misambu, kaa, mùshindù mwinè wùdici citùpishe mwoyi wanyì ne disànska pângâtèèleji musambu awu wà ne: *Yone Üvwakù Mummòne Mémè Anyì?* Taatù, ndi mutwîshìbwè ne netwìkalémù bônsò, yônsò wa kutùdi. Nènku tudi biinâme mpindyewu batàngile ku lupwishi, ne tudi—tudi tulòmba bwà Wàkidileku disàkidila dyètù—dyètù, ne kanyinganyinga kètù, ne disambila dyètù bwà muntu ne mukwèndè.

<sup>27</sup> Nènku mpindyewu tudi tubuulula Dîyì Dyèbè, citùpà cinsantu cyà disangisha cìdi cìmwèka cinsantu kutàmba—kutàmba bikwàbò, bwalu tudi bamanyè ne mu cikondo eci tudi tukwàta mudimu ne bantu, bwà kubàlombola ku Bulelèlà, kùdì Kilistò ne ku Dîyì, dìdì Kilistò adi. Nènku tudi tulòmba bwà Wêwè kutùkàngwilakù Dîyì. Ka—katwèna bakùmbànè to, Mukalenge, kàdi Wêwè ngudi mukùmbànè mu byônsò. Pa nànkù ndi ndòmba bwà Übeneshèku didifilà dyètù ditekète edi, nènku swàku dilòòlò edi tûdijandùlè ne tujingululè kaaba kètù mu Dîyì dyà Nzambì. Enzàku nànkù, Taatù. Nènku netùKupè butùmbi, bwalu tudi tulòmba nùnku mu Dînà dyà Yesù. Amen.

<sup>28</sup> Mpindyewu, mbilenga be bwà kwikalakù kaaba aka. Ndi ne tuntu ndambù tûndì mufùnde mwab'ewu tûndì mêmè ngeela meeji ne ndi mufwànyìne kwikalà ngenza kwòshakù dísù, bwà tusunsa tukesè, bu mûndì ncíyi ncinka ne mbatwítàbile bwà kulama cibambalu eci mukùngùlù mule menemene dilòòlò edi nànscha. Ne mêmè pàànyì, ndi mwènze ànu bu ne, munkaci mwà beena Mpenta, ntú ànu bu udi ne lujoòkò, nudi bamanye's.

<sup>29</sup> Ndi mvùluka. Nkàadi munwàmbile, pàmwăpa. Pâmmwènè mwambi wa beena Mpenta musangu wà kumpàla, ùvwa n'Révérend Robert Daugherty wa ku St. Louis. Ndi ngeela mpatà bwà ne nànscha umwe wa kunùdì ùvwakù mumumanyè. Nwamònù bujaadiki bwà mwanèndè mutekète wa bakàjì mu mukàndà awu. Yéyè ùvwa—ùvwa... Mwânà wa bakàjì awu wàkondopiibwa disaamà dyà St. Vetus, ne bàvwa bamwelè làà. Nènku ki mûngàkatwìlanganà ne beena Mpenta bàà kumpàla nànkù awu.

<sup>30</sup> Nènku, ewu, ngâkaya kamutèèleja ùyiisha, ne—ne, ekèlekèle, yéyè's—yéyè's ùvwa mwà kuyiisha. Uvwa mufwànyìne... Kàvwa mene mwà kwindilakù kantu nànscha kàmwè to. Nènku ùvwa

mwà kuyiisha too ne muvwà lupeepèlè lùmupàtuka lwônsò, ne kwîsù kùlwa bleu, ne binù byèndè bìvwa bìtuutakana, mufwànyìne kulenga ne pansi. Ne ùvwa mwà kulaminyina mwéyelu, nuvwa mwà kumuumvwa ku ndekeelu kwà cimenga kwinshì kwàka, mene's, ùbànduluka wènda ùyiisha. Ki mêmè kudyàmbidila ne: "Ekèlekèle, ncyéna—ncyéna ànu mwà kucelelakù meeji ne lükàsà lwà mùshindù wàwa to."

<sup>31</sup> Mêmè bìkèngela ànu ngangàte dìbà dyànyì. Mêmè ntu bu udi ne lujòòkò, kàbidì, ngenda nkùlakaja, nudi bamanyè's, ngenda ndìkòka, nànku ndi ntèkemena ne nenùntwàlèku mu tusunsa tukesè.

<sup>32</sup> Kùdi cintu cìmwèpelè cyà bushùwà, cîndì mêmè mumanyèku ne kacyàdyàkupangilaku to, ki Dîyì Dyèndè. "Maulu ne buloba nebijiminé, kàdi Dîyì Dyèndè kadyàdyàkupangilakù to." Pa nànku tubuululàáyaaku mpindyewu, panwikalà ne Bible wenù, ne baswè kubalaMù, mu Mukàndà wà Yeshààyì, nshapità wa 53 wa Yeshààyì. Ndi njinga kubala cyôcì eci ànu bwà kwibaka, kupertak cyena-bwalu bwà kwibakilapù dyumvwija, bwà katancì cyanaàànà.

*Nganyì udi mwitâbùùje mulubù wètù?... nkùdì nganyì kùdì dibòkò dyà MUKALENGE dibuulùdùùbwé?*

*Bwalu yéyè neàjuuke kumpàlè kwèndè bu cikùnyìùbwà citekète, ne bu muji wùpàtuka mu buloba bùmè: yéyè kêna ne mmwènekelu anyì ne dikòka dyà ntèmà to; ne patwàmumònà, kakwéna bulenga bwà bikèngela tùmujingè to.*

*Yéyè mmupeetula ne mubèngìùbwé kùdì bantu; mulùme wa tunyinganyinga,...mwibidìlàngàne ne lutatù: ne twâkasokoka mpàlè kumpàlè kwèndè; ùvwa mudyombòla, ne twétù katwàkamutwà mushinga nànsha.*

*Cyà bushùwà yéyè ngudi mwambùle ntàtù yètù, ne mwambùle tunyinganyinga twétù; kàdi twétù kumubala bu munyookùùbwé, mutucùùbwé kùdì Nzambi, ne mutacishìùbwé.*

*Kàdi yéyè wàkatàpiibwa mpùtà bwà kushipa kwètù kwà mikensi, wàkazaajiibwa bwà bubì bwètù: dinyooka dyà ditalala dyètù dyàkapóna pambidi pèndè;...ku mibündàbündà yèndè twâkondopiibwa.*

*Twétù bônsò bu mikòòkò twâkapàmbùka; tudi bakudimùkile muntu ne muntu ku wendè njila; ne MUKALENGE...wàkatèèka bubì bwètù bônsò pambidi pèndè.*

*Wàkacincimikiibwa, ne wàkatàcishiibwa, kàdi kàakabuululakù mukana to: bààkaya nendè bu mwàna wà mùkòòkò ku cishipeelu, ne bu mùkòòkò kumpàlè*

*kwà bawùkòshi bàà myôsà mwikàle kamàmà, . . . yéyè kààkabuulula mukana nànsha.*

*Wàkuumushiibwa mu bùlokò ne ku cilumbulwidi: kàdi nganyì wâmbila lukòngò lwèndè? bwalu wàkuumushiibwa pa buloba bwà bàdì ne mwoyi: ne bwà . . . kushipa kwà mikenji kwà cisàmbà cyànyì yéyè wàkatuucciibwa.*

*Ne wàkenza bwà lukità lwèndè kwikalalù pàmwè ne beena lwonji, ne babanji mu lufu lwèndè; bwalu yéyè kí mmwenzè bwalu bwà ciputuku nànsha bùmwè, nànsha diseeswishangana kadìvwakù mukana mwèndè amu nànsha.*

*Kàdi byàkasànkisha MUKALENGE bwà kumuzaazayè; yéyè e kumufikishayè ku dibungama dikolè: pawàvvuijá musùùkà wèndè mulàmbù bwà mpèkaatù, yéyè neàmonè dimiinu dyèndè, ne neàleepeshé matukù èndè, ne disànkà dyà MUKALENGE nedítanté mu byanza byèndè.*

*Yéyè—Yéyè neàmonè byà ku didinyèngà dyà musùùkà wèndè, ne neikale musànkishiibwe: ku dimanya dyèndè musadidi wanyì mwakàne neàbingishè bààbûngì; bwalu yéyè neàmbulè bubì bwàbò.*

*Kí bwà cinyì mêmè nêmmwabànyìnè citùpà cyà banène, neàbanyanganè bintu bipàwula mu mvitâ ne beena makàndà; bwalu yéyè . . . wàkiicikija musùùkà wèndè too ne ku lufu, ne wàkabadiibwa pàmwè ne bashipi bàà mikenji; ne wàkambula mpèkaatù yà bààbûngì, è kwenza dyakwilangana bwà bashipi bàà mikenji.*

<sup>33</sup> Ndi muswè ànu ngàmbè nùnku, ànu bwà kaacyena-bwalu kakesè cyanàànà. Ndi muswè kwangata cyena-bwalu ku cyôcì aci, cyà ne: *Mudimu Mwowela Byanza Wà Nzambi Mumanyishiibwe*.

<sup>34</sup> Mpindyewu, eci ncifwànyìne ànu kwikala cye—cye—cyena-bwalu cyètù cyà kubala eci, bwà kupàtula mudimu kampànda mwowela byanza. Kàdi patùdì tucitàngila, mutùdì bafwànyìne kwela meeji, ncifwànyìne kwikala cîngà cintu pa kuumusha mudimu kampànda mowela byanza, bwalu ncyambè ne: “Twàkasokoka mpàlà yètù kumpàlà Kwèndè, ne kakùvvakù bulenga butuvvà mwà twétù kuMujingila to.” Ne misangu yàbûngì, citùdì bafwànyìne kubiìkila ne mmudimu mwowela byanza aci, pàvvà Nzambi kàyi mufwànyìne kwikala ne cintu nànsha cimwè cyà dyenza naaci to. Bwalu, lungènyì lwà muntu ndikùtakana kùdì Nzambi, kàdi dikùtakana dyà Nzambi dìdì ne lungènyi kutàmba lungènyi lwônsò lwà bantu.

<sup>35</sup> Nènku tudi tumòna mwômò emu ne, Nzambi mmutùpèèshe cimfwànyì cyà cintu kampànda. Ndi muswè kuteetakù bwà kutwàla cimfwànyì eci kumpàlà kwètù, bu mûndì

mfika ku dyumvwa ne ncifwànyìne kwikala musangu wà ndekeelu wùdì bàmwè bàà kutùdì bàdisangisha. Tudi mwà kubènga kumònangana cyàkàbìdì muntu ne mukwèndè mutùdì badìsingishe mpindyewu emu. Ki bwà cinyì, pìikalàbi ne tudi badìsingishe mu kiipàcìlà aka, kabiyi bwà kwikalabò batùmònà anyì bwà kutùùmvwabò...

<sup>36</sup> Kàdi tudi benzè bwobùmwè bwètù muntu ne mukwèndè patùvwà tufila cyàkudyà cilenga eci dìlòòlò edi apu, ku mèèsà eku, patwàdùìshi mibidi yètù yà musunya apu, nènku mpindyewu tudi baswè bwà Nzambi àdìishè musùùkà wètù ne Manà Èndè àdì masokoka awu. Ànu bakwidi bààbwèdì mu mwaba mutàmbe Cijila abu kí bádibò baanyishile bwà kudyà Cyàkudyà Cyèndè.

<sup>37</sup> Nènku bu twétù mwà kumònà, dìlòòlò edi, cyàkudyà cyètù—cyètù cyà cìfwètekè eci, Ncyéna ngeela meeji ne nkààdiku mudyè di—dídýà dinènè dyà mikùùkûku, mu myaba yônsò yínkaadìku mwenzènè masangisha ayi, bu mùdi dìlòòlò edi, mûnkààdiku mupetè dibìlù dímpè dyà cìfwètekè dyàbwena divwàbo bààbanya dìlòòlò edi to. Mpindyewu, nudi numònà's, bwalu bìvwa bìkèngela twétù kwikala ne cyôcì eci; pìikalàbi ne tudi mwoyi, bìvwa bìkèngela bwà cintu kampànda kufwàci bwà twamònà mwà kusànkila cikondo eci cyà bwobùmwè, ne kukwàcisha kàbìdì myoyi yètù.

<sup>38</sup> Mvwa nyikilangana ne muntu kampànda utu mudì wa bisèkiseki nkààyaabi, ànu àbìdì àdì pansi' aa, ki kungambilayè ne: “Èè, mêmè—mêmè ncyéna mpetangana neebè ku mèyi to.” Èè, yéyè—yéyè kwenza bu mumpéeshè mukàndà mumfùndila's, mwikàle újinga bwà kutwilangana naanyì pèètù pàà bábìdi. Ki yéyè ne: “Mwanèètù Branham, mêmè's ntu ànu nkwangata bu muntu wa cijila.” Yéyè ne: “Kàdi pàndì muumvwè wamba mûvwa mudyè munyìnyi wà ku cibelu cyà ngulube ne mayi bu cyàkudyà cyà mu dinda,” yéyè ne, “aci—aci kàdi kuntakeshaci mu maboku's.”

<sup>39</sup> Èè, aci, ncyénaku mufwànyìne kuteeka dibwe dyà cilèndwishi mu njila wendè to. Mpindyewu, awu's ngwèndè pèndè mùshindù wà kwitabuuja. Kàdi mêmè kwamba ne: “Èè, mukalenge, mêmè ncìyi mudyè to, nyéna ne mwoyi to.”

<sup>40</sup> Yéyè kwamba ne: “Kàdi, udi umònà's, s'bìvwa bìkèngela wêwè kudyà ngulube, ne—ne kushebeya nzòòlò.”

<sup>41</sup> Mêmè ne: “Mukalenge, s'tudi ne mwoyi ànu ku bintu bifwè. Cyûdì udyà nànsha ciikàle cinyì. Udi udyà bisèkiseki. Utu udyà. Wéwè udyà dyâmpà, blé's mmufwè. Wéwè udyà ditalà, ditalà's ndifwè. Wéwè udyà nkùnde, nkùnde's mmifwè.”

<sup>42</sup> Cyônsò cyûdyadyà, udi mwà kwikala ne mwoyi mu mubidi ànu bwalu cintu kampànda ncifwè bwà wamònà mwà kwikala ne mwoyi. Mpindyewu, cyônsò cyûkènji, nànsha kunwà mabèèle, twîshi, nî ncinyi cyônsò, bìkèngela wikalè ne mwoyi ànu ku bintu bifwè. Nènku bìdi ànu bîleeja ne, byôbì bìkèngela bwà

twêtù kwikala ne mwoyi wà mu mubidi ewu, ne ànu ku bintu bifwè nkutùdì mwà kwikala naawù, bivwa bikèngela bwà cintu kampànda kufwàci bwà twamònà mwà kwikala ne mwoyi Cyendèlèèlè. N'Yesù Kilistò, udi Nzambì mufile bu cyà bupikudi bwètù twêtù.

<sup>43</sup> Nènku mpindyewu, pângààkapetanganà ne beena Mpenta bwà musangu wà kumpàla, Mvwa—mvwa tuyè ku Californie, ànu ditùnga ditwàngaji mwab'ewu edi, dyàmwàmwà dyà musùlu. Nènku mvwà nsanganyiibwa mu Los Angèles. Ncìvwakù ne mwoyi mu matùkù a mwambi mukàjì mwendè luumù ewu to, Màndàmù Semple... Aimee Semple McPherson awu. Mêmè kufika ku ditwilàngana ne mwanèndè wa balùme, Rolf, mwena Kilistò wa bukàlànga, ne—ne mukàjèndè ne dìkù dyèndè. Ncyà bushùwà ne mbantu bàà maalu malenga, ne Docteur Teeford ne bààbûngì bàà ku musùmbà wà mu Angelus Temple awu. Nènku mvwa muvíshè Cibìlù cyà disànkà cyà Mpenta, Cibìlù cyà disànkà cyà bidimu makùmi àtaanu kuntwaku, kùkaadi ndambù wa bidimu, ne ncyà bushùwà ne ngâkapicila mu cikondo cilenga cyà dikèma.

<sup>44</sup> Nànku bwà kuneemeka mukàjì ewu wâkafila cilejilu mwàkacìfilàye amu, bwà kuteeta ne mwèndè mwônsò, ne ku—kuleeja cìvwà mu mwoyi wèndè, ngâkamutwà mushinga pa kuya ku lukità lwèndè ku Forest Lawn kwàka. Nènku pâmrvwà mwimàne mwaba awu ne cifulu cyànyì citùùla, ne—ne kwinyika mutù ne kusàkidila Nzambì bwà nsòmbel mulenga wa mwena mudimu mukàjì mukesè ewu, Kundòmbàbu dìbà adi kùdì musùmbà wûmvwà naawù awu, kasùmbù kàà bambi aku, ní mmvvakù mufwànyìne kwenza lwendo lwà mpicila mu... bwà kupicila mu Forest Lawn mwônsò amu. Kàdi munda mwà nzùbu wa dilamina bitàlù amu, anyì mwônsò munùdì nucìbìkila amu, mvwa mbandila mazòlì mashììleshììlangànè, ne mêmè kumònà Didyà dyà Mukalenge, ne kushààlapu. Bâàbûngì bàà kunùdì bàkaadi bacimònè, pàdibo bàcìmunyika ne bukènkè, Didyà dyà Ndekeelu, ne bumvwè bwalu-bulonda bwà cyôci aci.

<sup>45</sup> Kàdi cìmwè cyà ku bintu bitàmbe kwikala byà pabwàbì bîngààkamònàmu, cìvwa mpaùdi ubwela ku ciibi, ngeela meeji ne ncifwànyìne kwikala ku luseke lwà ku esètè. Kùvwa lu—lupingù lwà Môssà lutèèkà mwaba awu, lùvvwà mudimu wà mu katòngòbèlà wà Michel Ange, Ngeela meeji ne mmùvwàbi's, musongi wà lupingù alu... Ndi mwà kwikala mutùpàkàne bwà muntu awu, ngeela meeji ne mmwòmò, Michel Ange, awu—awu... musongi munène wà mpingù uvwa mufwimbe lwôlò alu awu, anyì, cimfwànyì cyà Môssà. Nènku pàvvwaye ùbùmvwijaci apu, mu—mulombodi uvwa utwèndesha awu, wàkamba ne awu wùvvwa ngùmwè wà ku midimu myowela byanza mitàmbe bunène yìvvwàku Michel Ange mufwimbe. Ki yéyè ne wàkamwangata matùkù èndè à mwoyi àbûngì, mudimu mukolè.

<sup>46</sup> Pashiìshe mêmè kumònà, ngeela meeji ne pàvwa mpa cinù cyà dyàbalùme. Lupìngù lùvwa lùmweka lupwàngàne, lufinùnùke, ne Môsà mwikàle ne mabwe à mikenji mu cyanza, ne mwedi wèndè mule. Nènku cìvwa, mu bushùwà bwà bwalu, didifwikakakajila dyà Michel Ange, dyà mùvvwà Môsà ne cyà kwikalà. Pàmwàpa kacya kàvwakù mwanjì kumònà cimfwànyì aci to, kàdi, mu meeji èndè yéyè mwinè, wàkazòla cìvwàye mwwelè meeji ne ki mùvvwà Môsà ne cyà kwikalà.

<sup>47</sup> Nènku bwalu bùdi bùlonda ne, mmwenzè ànu ù—ùjikija lupìngù alu, ùlùkùpula lwônsò mu mùshindù mupwàngàne, kwimanayè paanyimà bwà kubandilayè mudimu wèndè awu. Ne pààkalwàye musonsödibwe, mu mùshindù wà ne lwàkatàmba kufwànàngana... Cìvwàye naaci mu meeji aci, wàcyenjì ne cyanza cyendè. Lùvvwà lufwànàngàne bikolè naaci, ne bidimu byônsò abi ùvwa mucïndile, mu mùshindù wà ne mutàmbe kwambwibwa mu disonsodiibwa, wàkalùtuuta cintu pa cinù ne kwela lubìlè lukolè ne: "Akùlà!" Nènku ki kaaba kàdi kapandìke pa mu—mukòlò, pa cinù cyà Môsà nkôkò aku, mwaba wàkatuutà Michel Ange nsandu wendè awu, bwalu ùvwa mutàmbe kusonsodiibwa.

<sup>48</sup> Nwamònù's, kùvwa cintu kampànda munda mwèndè amu, ku cibangidilu aku, cyàkenza ne àzolè cimfwànyì cyà mu mutù cyà mùvvwàye wèla meeji ne ki mùvvwà Môsà ne cyà kwikalà. Nènku mmwenzè ànu ùcimona cileejìibwe kumpàlè kwèndè, cintu mene cìvwàye naaci mu meeji aci, cìvwàye wèla meeji ki mùvvwà Môsà ne cyà kwikalà aci; ne mulàma cìkèènà-kumònà aci bidimu ne bidimu byônsò abi, ne mwàkangatayè cipese cinène cyà dibwe dyà granite, è kukòsayè kapese apa kapese ne pààpa, ne kubifundayè, bwalu bivwa bikèngela bwà kulwaci cipwàngàne. Nènku pàákavwijiwbwàci cipwàngàne kumpàlè kwèndè, yéyè—yéyè kumònà cimfwànyì cyà cìvwà mu meeji èndè. Ki cìvwà cimusonsôle bikolè, bwà kutuutayè cimfwànyì aci, ne kwelayè lubìlè lukolè ne: "Akùlà!" Bidimu byèndè byônsò byà mudimu mukolè byàkafila difutu. Mudimu wèndè munène wà byanza wàkajika.

<sup>49</sup> Mpindyewu tudi tumònà aci, ne mêmè—mêmè kusonsodiibwa kùdi cyôci aci, bwalu ngâkadyàmbidila ne, mu bulelèlè, cimanyinu aci pa mukòlò, cyàkacyènzà, bwànyì mêmè, dimu mwowela byanza. Bwalu, ànu, bu ne cìvwa ndizòla dikwàbò, anyì cintu kampànda cyà Môsà, cimfwànyì cyà mùshindù kampàndà cìvwà muntu kampànda mufwìkàkàje. Kàdi, muntu uvwa wenza mudimu awu awu, byàkamusànkisha bikolè mu mùshindù wa ne wàkalùtuuta. Ne cimanyinu cyàlù aci ncyàkàluvvijà mudimu mwowela byanza bwànyì mêmè, bwalu cyàkaleeja mu mùshindù mupwàngàne cìvwà mu meeji èndè ne ki mùvvwà Môsà ne cyà kwikalà.

<sup>50</sup> Kaa, mêmè kwimana mwaba awu. Byàkakèngela bwà ngùùmukèku ndambù wa tusunsa, bwà kwelakù meeji pa—

pa cìvwà cyôci aci ne cyà kwikala cyumvwìje bwèndè yêyè, ne—ne cìvwàci cyumvwìje bwànyì mêmè mwine musangu awu. Pashìshe kumvwilaci mu meeji, bwà cîndì njinga kunwàmbila eci.

<sup>51</sup> Twânjì tùùmushààyìkù meeji mpindyewu kùdi Michel Ange, tuàtàngijè kùdi Musongi munène wà mpingù, Nzambì wa Bukolè Bwônso, Uvwa, ku cibangidilu, kumpàlè kwà kwikalakù ditùkù anyì kabundubundu kâa ditùkù, kumpàlè kwà kwikalakù kapwìshipwishi anyì kasùnsukilà, Nzambì, mu meeji Èndè, ùvwa ne muntu, mùvvà muntu ne cyà kwikala, cìvwàyè ne cyà kwikala, ne mùvvàyè ne cyà kwenza maalu. Nènku Ùvwa muswè bwà muntu awu ikalè citùpà cyà ku Yéyè ne: “Pa nànkú Wàkenza muntu mu cimfwànyì Cyèndè sungasunga, ne mu difwàñangana ne Nzambì ki mwàkafûka Yè muntu,” okaa, pàvvà Nzambì, ku cibangidilu, mwenzè mudimu mwowela byanza ewu, cintu kampànda cìvwà cileejà patòòke meeji Èndè.

<sup>52</sup> Vùlukààyì ne, kùdi mùshindù wa Mwoyi wa Cyendèlèlè ànu wùmwèpelè, ne étù...nànsa ménà étù ne meeji étù àvwaku ne Nzambì kumpàlè kwà difùkà dyà dyulu ne buloba. Bwalu mpindyewu tudi ne Mwoyi wa Cyendèlèlè. Ne bwà kwikala cyôci aci, bikèngela twìkalè citùpà cyà Nzambì. Pa nànkú bìvwa bikèngela twétù kwikala too ne mu meeji Èndè, bwalu tudi ne Mwoyi wà Cyendèlèlè, ne tuvwa badyànjila kulonglwela mwoyi ewu. “Ne ménà étù àkafundiibwa mu Mukàndà wà Mwoyi wà Mwâna wa mùkòòkò kumpàlè kwà difùkà dyà dyulu ne buloba,” bilondèshìle Bwàkabuulwìbwà. Mpindyewu, Nzambì awu ùvwa neetù mu meeji Èndè, dìbà adi tudi ne Mwoyi wà Cyendèlèlè, bwalu dìbà adi Yéyè wàkatùtùndùbulà ku díyì, pèètù kufika ku diikalakù. Ne díyì dìdì ànu meeji mamwéneshìlbwe. Nzambì ùvwa neetù, ku cibangidilu, mu meeji Èndè.

<sup>53</sup> Mpindyewu, ne pààkenzà Ye Adàmà, muntu wa kumpàla awu, mùshindù mene wùvvàbi bipwàngànè's wè. Ùvwa mufwàñangànè ne Nzambì. Nzambì, Nyumà Mwîmpè munène awu, mwikàle ùlààdila pa buloba, ne Yéyè...nyuuni kupàtukayì, pàmwàpa, ne nyama, bintu bishìlèshìllàngànè, è kutùngùnuka ne kutàmba kwangata mmwènèkelu wa Ewu uvwa munkaci mwà kulààdila awu. Mu mùshindù wà ne, ndekeelu wa byônsò, kulwakù cifùkìibwa cyà mùshindù mufwàñangànè ànu menemene ne Yéyè uvwa ulààdila awu, Nzambì. Nzambì ùvwa, anyì, muntu ùvwa mwenza mu cimfwànyì cyà Nzambì. Pashìshe, pààkamutèèkà Ye mu budimi bunène ebu, mwàkateèkà Michel Ange mudimu wèndè munène wà kacya bààmùlela awu, ne mwàkénza basongi banène bàà mpingù bônsò, Nzambì wàkatèèka mudimu Wèndè wà byanza mu budimi bwà Edènà, kumwenzela mumukwàcishi. Ndisànkishiibwa kaa—kaa—kaayìpu dikùmbànàngànè dìvwà kùdi Nzambì, mu mùshindù wa

ne Wàkikiisha ne diikisha. Cìvwa ànu diikisha. Mudimu Wèndè wùwwa mujikè.

Pashiishe ki bwalu bwà dibungama kulwabù, bwà kùdì mulwishì.

<sup>54</sup> Mpindyewu mònaayi. Cintu cìmwèpelè cîndì njinga bwà nwénù kulama mu meeji, ncyà ne Nzambi wàkapèèsha muntu ewu dikùbiibwa. Wàkamupéèsha...Wàkamukoleshila munda mwà Dîyì Dyèndè, bwalu Wàkabàmbila cìvwàbo mwà kwenza, ne cìvwàbo kabàyi mwà kwenza.

<sup>55</sup> Ne pa cishìmikidi cìmwècìmwè aci mpatùdì batèèkìlbwe leelù ewu, citùdì mwà kwenza, ne citùdì katuyi mwà kwenza. Nànscha twétù biikàle bimpè bàà bishi, nànscha tuyu mu èkèleeziyà bishi, anyì twenza *cikampànda*, bìdi bikèngela tûlediibwe cyàkàbìdì. Nwamònú anyì? Bìdi ne cyà kwikala nànnku.

<sup>56</sup> Nènku Nzambi wàkambila Adàmà cìvwàye mwà kwenza ne cìvwàye kàyi mwà kwenza. Wàkamutèèka paanyimà pàà Dîyì Dyèndè.

<sup>57</sup> Ki pashiishe mwena lukunà kubwelayè, ku diseeswihangana, ne kudifindayè wènda ùkalaba ku bimanu byà Dîyì dyà Nzambi, bwalu ciibi cìvwa cimuunzulwila, ki kunyangakajayè cimfwànyì aci, kucìvwija mpèkaatù. Ki bùmwè bwà ku maalu-malonda à matàmbe kwikala à dibungama mbwôbù abu.

<sup>58</sup> Bwà kwela meeji ne, muntu wâkenjiibwa mu cimfwànyì cyà Mufuki wèndè, ne wâkapèèbwa cimanu bwà kwimanyina paanyimà pààcì awu, bwà ne Dîyì adi kadìvwakù mwà kupangila to nànscha kakesè. Ki—ki ditèkemena dyà mwena Kilistò ndyôdì adi. Didi wendè—wendè ngabu. Ki byèndè byà mvità. Ki lubwebwe lwèndè leelù ewu, lùdì ne, kushààla paanyimà pàà Dîyì; mwena kwitabuuja yônsò.

<sup>59</sup> Mpindyewu, kwêñàku ne cyà kuumuka paanyimà pàà Cyôci aci to. Paüdi umukapù, wêwè, udi ukàngwila mwena lukunà ciibi, pàdibo bàmba ne: “Kaa, èè, udi mwà kwenza ndambù wa *cikampànda*, ne ndambù wa *cikansanga*.” Nzambi mmuswè bwà wêwè kutàpuluka ne cyônsò cidì cibìlkidiibwà ne mmpèkaatù. Mutèèkìlbwe mu kaabujimà ku luseke bwèndè Yéyè, ne bwèndè Yéyè nkààyendè.

<sup>60</sup> Yéyè udi ne kiipàcìlà mu nsòmbelu webè, muntu-nkààyà yônsò, mu mùshindù wà ní nganyì ní nganyì mukwàbò yônsò pa buloba apa kàyikù mwà kwangatakù kaaba kèèbè to. Nzambi udi ne cintu kampànda bwèbè wêwè. Udi mwenjìibwe mùshindù awu. Uvwa mwenjìibwe mùshindù awu mu kiipàcìlà. Nzambi mmudishikàmìnè mu mudimu Wèndè. Yéyè mene...Bintu bìdi bishìllàngànè. Tutu bashìllàngànè, muntu ne mukwèndè.

<sup>61</sup> Tudi tumòna mu mwɔyi wà bukwànyama. Tudi tusangana ne, mu mwɔyi wà bukwànyama, kùdi nyama umwèpelè, Nzambì wàkenza nyama kampànda mwambudi wa majitu, bu mùdì kabalu, ne—ne kôkò bikèngela kàkwatè mudimu. Kàdi ngombe yéyè ndidifila. Nènku, kàdi, nta—ntambwe ne cisùmpàntambwe yìdi yèndakana mu diituyayi ne mudimu mukolè anyì cintu kanà cyônsò. Yéyè mmwenzè nyama munènaanènààlè bu mùdì nzevu, kàdi pashiishe kwenza kalùmyànà kakesè bu mùdì kapuku. Mpindyewu, nganyì udikù bwà kwambila Nzambì cyà dyenza ne mwà kucyènza? Yéyè ùdi ùcyènza mu mùshindù Wèndè Sungasunga.

<sup>62</sup> Ne Yéyè ngudi wenza mikùnà. Ùdi wènza bipèèlè. Ùdi wènza mâ—mâyi a mbû. Ùdi wènza mpàta. Ùdi wènza mucì wà mùshindù kampànda, dibaya dishilè, dibwè dyà ngajì, ne—ne bikwàbò. Yéyè ngudi ucyènza.

<sup>63</sup> Ùdi wènza bantu bashìllàngànè. Ùdi ûtupèèsha, muntu ne muntu, mwaba mushìllàngànè. Ne dibwè dyà ngajì kadyèna mwà kwikalà mucì wà hickory to. Mucì wà hickory kawèna mwà kwikalà dibwè dyà ngajì to. Muntu nànsha umwe kénà mwà kwangatakù kaaba keebè to, ne kabivwa bikèngela bwà wéwè kuteeta kwangata kaaba kàà nî nganyì nî nganyì mukwàbò yônsò nànsha. Bwalu, wéwè udi muntu-nkààyà, bwà Nzambì, ne Nzambì udi neebè ne kiipàcìlè. Yéyè ngudi mukwenzè mùshindù awu. Wéwè udi wamba ne: “Wàkacyènza bwà cinyì?” Yéyè mmudishikàmìne. Yéyè ùdi ne kabingilà bwà bììkalè mùshindù awu.

Kàdi tudi tusangana ne twètù bônsò tudi balamìibwe kùdi Díyì.

<sup>64</sup> Mu dyulu, tudi tutàngila mibidi yà mu dyulu. Bible ùdi wàmba ne nànsha mene mùtootò wùmwè mwinè mmushìllàngànèkù ànu ne mukwàbò. Kùdi Sirius ne mikwàbò mishìllàngànè. Ne Mars ne Jupiter, yônsò mishìllèshìllàngànè ayi, mmishìllàngànè ewu ne ewu. Dibà ndishìllàngànè ne ngondo, ne ngondo mmushìllàngànè ne mitoootò. Ne kùdi Banjèlo, bu mùdì, kùdi Baselèfimà ne Bakèlùbà, ne Banjèlo ne Banjèlo banène, mu—mu bipidì byàbò. Ne nànsha mu buloba bupyabùpyà bùcìlwalwà, bamfùmù bàà pa buloba bàdi bàtwàla buneemè bwàbò mu cimenga aci.

<sup>65</sup> Ki mutwìkalà nànku awu misangu yônsò. Bwalu Nzambì kî n’Nzùbu wa Sears ne Roebuck Harmony nànsha. Yéyè ùdi Nzambì wa nkòngo nè nsanzu. Ùdi wènza ewu mùshindù, ne mukwàbò mùshindù. Kàdi tudi ne cyà kuMukwàcila mudimu mu mùshindù wùdì Nzambì mutwènzè awu, ne kwikalà ne disàンka, ne kushààla paanyimà pàà Díyì Dyèndè. Nènku mùshindù awu ki wàkacyènzà Nzambì.

<sup>66</sup> Kàdi patùdì tujandula ne mwena lukunà wàkapìcila ku Díyì adi, ku cyôcì eci, mudimu wà byanza wà Nzambì ewu,

yéyè kucinyangakaja. Nènku ki cìdìye munkacì mwà kwenza mpindyewu menemene ncyôcì aci. Üdi ùdìfindila ku mudimu wà byanza awu, mwena lukunà awu's, ùteeta bwà kutùvwija Nsangilu wa Maèkèleziya à Buloba bujimà. Ne muntu ùdi ne... Mòna's, muntu kêna nànsha mwà kwitabangana ku mèyi ne mukwèndè to, mmunyì mutwàfikishà buloba bujimà ku diitabangana ku mèyi ne muntu kampànda? Nènku panùdì ànu ne nwenjì aci...

<sup>67</sup> Tudi ne Umwèpelè ùtudì ne cyà kulamangana nendè mu dyumvwangana, n'Nzambi. "Ne ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi." Ne Dìyì didi dishàala ànu Nzambi, ne nedìükalè misangu yônsò ànu Nzambi, bwalu Nzambi ùdi mu Dìyì. "Ne Dìyì dyàkavwijibwa mubidi ne dyàkasòmbela munkacì mwètù," mu Mupèrsonà wa Mwânà wa Nzambi.

<sup>68</sup> Mpindyewu tudi tusangana, ne, paanyimà pàà Yéyè mananè kujandula dinyangakaja dinène edi, kumwèkabi bu ne, bu biìkala wêwè ne mêmè, paanyimà pàà bamane kwelamu dìbà dyônsò adi ne diditàcisha dyônsò adi, nùnku's tudi batwè cintàkanyì aci musèbà bacilekèle ciya ànu nànku, kàdi, kí n'Nzambi to, Kààkaswà Yéyè kulekela mudimu Wèndè awu wùya ku kabütù nànsha. Ki dinanga dyà Nzambi ndyôdì adi. Kabyèna bikèmesha to pààkambà mwedi wa kasàlà awu ne:

Bu tuvwa bafwànyìne kuuja mbû ne mâyì à  
mufundù,  
Ne bu maulu mwà kwikala mavwijìbwè cisèbà  
cyà kufundila;  
Ne kaamucì kônsò pa buloba kiikàle kasàlà,  
Ne muntu yônsò mwikàle mufundi wa bu ne ki  
wèndè mudimu;  
Kufunda dinanga dyà Nzambi wa muulu  
Mbifwànyine kukàmisha mbû;  
Anyì mukàndà muvùnga awu kawùvwakù  
muwfànyìne kukùmbana byônsò to,  
Nànsha wôwò mwolola eku ne eku kwà dyulu.

<sup>69</sup> Nwamònú dinanga dyà Nzambi's! Paanyimà pàà muntu mananè kudishìnda ne mukàngwile mwena lukuna ciibi ku budiswîlè bwèndè, ne mubwelè mumunyangàkàje, ne mutèèke lufù munda mwèndè, nànsha nànku Nzambi kàvwa ànu muswè bwà ewu kucìmunyìbwayè to. Yéyè kutùùluka è kubangulula Ye byônsò. Ùvwa ne cyà kwenzulula muntu awu.

<sup>70</sup> Wàkatèèka Adàmà pa cipungidi kampàndà ne: "Enza cikampànda, kàdi cikansanga to; cikankènga, kàdi cikansanga to; kùlengi, kùkwàci, kùlabulu."

<sup>71</sup> Kàdi tudi tusangana ne, pààkabangululà Ye, Wàkabanga ne—ne Abraham. Kàdi mu Abraham, Wàkabanga nèndè pa cipungidi cyà kaciyi cyà mushìngà wà dyenza to. Kabiyi ne "wêwè muswè"

to. "Ngénji. Nkààdi mwenzè. Nkààdi mukubènèshe, wêwè ne dimiinu dyèbè, ne bikwàbò, paanyimà pèèbè." Cìvwa ncipungidi cyà kaciyi mushìngà wà dyenza to. Wàkabanga ne Abraham, mudimu Wèndè wà byanza mwenzulula, kàdi mpindyewu ne cipungidi Cyèndè cyà kaciyi cyà mushìngà wà dyenza. Dîbà adi, patùdì tusangana ne, Yéyè wàkashindameena pa Abraham ne wàkamupèèsha cipungidi, kaciyi cyà mushìngà wà dyenza to, ne mulayì.

<sup>72</sup> Pashiìshe kulwa Yè kùdì bankambwà, twêtù kulwa pashiìshe, mu Dipungila Dikùlukulu, patùdì twenda tupweka apu. Ki Yéyè ewu ùleeja patòòke cishìmikidi cyà mudimu Wèndè. Mpindyewu twêtù tudi ne Abraham, Izàkà, Yakòbò, Yozefù; bankambwà bânaayi.

<sup>73</sup> Mpindyewu, Abraham ùvwa ùleeja mudimu wà diitabuuja, diitabuuja, bwalu Abraham ùvwa ndiitabuuja. Ùvwa ne diitabuuja dinène, bwalu: "Kààkatènkakanakù ku mulayì wa Nzambi, ku bupidyà to." Pààbi, tudi bafwànyìne kwamba ne: "mbimwèke bìbì bipangè ne mwà kubìipa," ne byônsò bìmulwisha, yéyè kacya ànu wàkwàta kùdì Nzambi.

<sup>74</sup> Pashiìshe tudi ne Izàkà, uvwa mwânà munanga, uvwa ùleeja dinanga awu, bwalu, Abraham mwikàle cifwànyikijilu cyà Nzambi, mwàkàlambudiibwà Izàkà amu, Genèsè 22, tudi tusangana ne wàkambula nkùnyì kubànda naayì pa kakùnà, ne byônsò bileeja cimfwànyì cyà Kilstò, bìdyanjila kuMuleeja mu cindidimbì. Ki dêbà adi cimpàngà cyà mûkòòkò aci kulwaciì ne kulàmbùdiibwaciì pa kaaba kendé.

Mpindyewu aci cìvwa ndiitabuuja, dinanga.

<sup>75</sup> Ne Yakòbò, mbwena kwamba ne "munyèngi wa mwaba wà bendè," nènku ki mudìngyanganyì nyéyè awu. Ne tudi bamanyè ne bwà kwamba kwímpè nsòmbelu wa Yakòbò ùvwa ùleeja ngâsà, bwalu cìvwa nngâsà wa Nzambi, dîbà dyônsò, kùdì Yakòbò.

<sup>76</sup> Pashiìshe kulwakù Yozefù. Kakwèna cilumbù ne Yozefù to. Yéyè nguvwa mupwàngjàìbwé awu. Mupròfetà wa Nzambi wâkapàtuka munkaciì mwà bânà bâàbò awu. Ne mukinyìibwe, kakuyì bwalu to, ne wàkasùmbishiibwa. Ne mu mûshindù wônsò, nsòmbelu wendè wàkaleeja mu cindidimbì nsòmbelu wa Yesù Kilstò. "Wàkalwa kùdì bâà Kwàbò, bâà Kwàbò kabâàkaMwakidila to." Ànu mùvvà Yozefù mukinyìibwe kùdì bânà bâàbò amu, mwedìbwé mu dijimbà, bacinka ne ùvwa mufwè; kupàtudiibwayè, kubàndishiibwayè ku dyàbalùme dyà Pâlò. Ne pàvvwàye ûshiya nkwasà wa butùmbì, bâvwa bëèla mpungi, nudi bàmanya, cinù cyônsò cìvwa ne cyà kutwà pansi, kumpàlà kwà Yozefù.

<sup>77</sup> Tudi tusangana ne Yesù wàkasùmbishiibwa ku mushinga wà wipacila wùvvà Yozefù musùmbishiìbwé awu. Mupàtùdiibwe mu—mu ciinà amu; ne wàkabànda mu Dyulu; mmusòmbe ku

dyàbalùme dyà Nzambì. Ne pààlwà Ye ùfùmina ku Mwaba awu, “Mpungi neàdilè, ne cinù cyônsò necítwe pansi, ne ludimi lwônsò nelùMujikùlè,” bupwàngànè’s.

Aci cìvwa diitabuuja, dinanga, ngâsà, ne bupwàngànè.

<sup>78</sup> Pashìishe mudimu wà mubidi kulwawù, wà disonga edi dinène dyà lupìngù. Wàkenzela mudimu wà mubidi awu ku baprófetà. Baprófetà mbàvwà mudimu wà mubidi awu.

<sup>79</sup> Pashìishe ndekeelu wa byônsò kulwakù mutù wa mubidi munènè ewu, wùvvà Kilistò Yéyè mwinè. Baprófetà bônsò bàkaavwa badyànjile kwamba Bwèndè. Mudimu wônsò wà cishimikidi wùkaavwa mudyànjile kwamba Bwèndè. Kubangila ànu ku budimi bwà Edènà kwàka, kubangila ànu pa dîbà mene dyàkabangàYe adi ne: “Nênteekè lukunà pankaci pàà dimiinu dyèbè ne dimiinu dyà nyòka” apu. Nènku tudi tusangana ne Wàkabangila kuntwaku, kubànda ne ku-ku bankambwà ne kubwela mu baprófetà, ne kupàtukamù. Musangu ewu kâbìdi Yéyè wàkamònà cimfwànyì Cyèndè Sungasunga, pààkalediibwà muntu umwèpele pa buloba, mupàtuke munda mwà mukàjì, ùwwa mMudimu mwowela byanza wà Nzambì. Ùwwa m'Mwâna wà Nzambì, Yesù Kilistò. Kabingìlà kàvvà kènza ne Àlediibwè, mbwalu Yéyè ùwwa ànu menemene Dìyì.

<sup>80</sup> “Ku cibangidilu kwàkadi Dìyì, ne Dìyì dyàkadi ne Nzambì, ne Dìyì dyàkadi Nzambì. Ne Dìyì dyàkavwijiibwa mubidi ne dyàkasòmbela munkaci mwètù.”

<sup>81</sup> Mpindyewu tudi tumòna mudimu mwowela byanza mupwàngànè mumwènèshìbwè mu Yéyè. Yéyè ùwwa mupwàngànè, ànu mùdì Nzambì, mu mùshindù wà ne Yéyè wàkamba ne: “Mêmè ncìyi ngenza byenzedi byà Taatù Wanì to, kanùNgiitàbùùjì to. Nànsha Mêmè...Kanwèna mwà kuNgiitabuuja anyì? Itàbùùjaayi byenzedi, bwalu byòbì mbìdì bìnùjaadikilà bwà ne, Mêmè ndi Nganyì.” Mêmè ntù munangè aci. Nwamònù anyì? Yéyè kwamba ne: “Panwìkalà kanùyì nuNgiitabuuja Mêmè to...”

Bòbò ne: “Wèwè udi Muntu, uDìvvija wa mwomùmwè ne Nzambì.”

<sup>82</sup> KwambaYe ne: “Nwènù kanùyì mwà kungiitabuuja Mêmè to, itàbùùjaayi byenzedi bîNdì ngènza. Ne Mêmè ncìyi ngènza byenzedi byà Ewu udi muNtùme to, dîbà adi kanwèna ne bukenji bwà kuNgiitabuuja to.”

<sup>83</sup> Ki mùvwabi bìkèngela kàbìdì bwà mwena Kilistò yônsò, leelù ewu, kwikalayè ne bujaadiki bùmwèbùmwè abu. Mu Dìyì dilaya dyà Nzambì edi, nsòmbelu yetù yoyì kayiyì yinwàngana ne yikùmbanangana ànu menemene ne cidi Dìyì dyambè to, dîbà adi katwèna ne bukenji bwà kudibìikila mutùdi beena Kilistò to patwikalà katuyì balediibwe cyàkàbìdì. Yesù mmwambè, mu Maakò 16 ne: “Bimanyinu ebi nebìfilè aba bàdi biìtabuujà.” Nwamònù anyì? Kî nnè “bàdi mwà; bìvwa bìkèngela bwà bôbò;

pàmwăpa nebénzè” to. Nebàbyéñzè. S’ki Musongi wa mpìngu utu mutwéñzè awu. S’ki Èkèleeziyà wâkasongiibwa awu. S’ki—s’ki Mubidi wa Kilistò awu.

<sup>84</sup> Mpindyewu tudi tusangana ne cìvwa cìMuleeja mu mùshindù mupwàngàne. Musongi wà mpìngù mpindyewu ùvvwa ne Dîyì dileejìibwe cyàkàbìdì mu Mudimu mwowela byanza ewu, wùbùkidiibwa ne m’Mwân’Èndè, Nzambì, Èmanùwèlè. Anjì elààyibì ànu meeji, ne, muntu mudìfile mu mùshindù wà ne Nzambì wàkaDìmanyishila mwômò amu, mu mubidi awu, ne Yéyè wàkalwa... Yéyè ne Nzambì bààkalwa umwe. “Mêmè ne Taatù Wanyì tudi Umwe. Taatù Wanyì mmusòmbèle munda Mwànyì. Mêmè ntu ngenza misangu yônsò ànu cìdi cìsànkishà Taatù.”

<sup>85</sup> Ambààyibì tûng bu mwena Kilistò leelù ewu mufwànyìne kwikalala ne bujaadiki bwà mùshindù awu? Wéwè’s udi mufwànyìne kwikalala mudimu mwowela byanza mu Yuma mene emu, mu mùsèèsù. Wéwè ni udi mukàjì musukwidyanganyi wa bilàmbà paanyimà pàà mbaafù pambèlù pààpa, ikàlà wéwè ànu mudimu mwowela byanza wà Nzambì, paùdi mwà kwamba ne: “Ndi ngènza misangu yônsò ànu cìdi cìsànkishà Nzambì aci,” ne pàdì buloba bujima mwà kumònà mu—mudimu wà Yesù Kilistò wùdileejila mu wéwè amu.

<sup>86</sup> Byàkambiibwa, musangu kampànda, bwà ngôlò wa kale awu, kumpàlà kwà kwikalabò ne màshinyì àdì èngulula byamù awu. Kùdì...Bàvwa kale wàwa bàngata ngôlò bàmutuuta, mutuuci awu, ba-Indiens mu matùkù à kale pàcìvwa Arizona ewu ùcìbangilakù. Bàvwa bâtuuta ngôlò too ne pàvvà mutuuci awu ùmònà cimfwànyì cyèndè yéyè mwinè mu ngôlò awu. Bàvwa bâtuuta buumusha bunyingunyingu bwônsò bwà cyamù cifiìke, bisòtà, manyaanù, bàbyùmushamù, too ne pàvvwa mutuuci awu mwà kumònà cimfwànyì cyèndè yéyè mwinè byenzè bu mu lumwènù, ùtuuta ànu kutuuta.

<sup>87</sup> Mpindyewu, ki cìdì Èvànjeeliyò wènza. Bantu bààbûngì kabàtu baswè kubàkudimunabò ne kubàtuutabò to. Èè, cìdì cikèngela èkèleeziyà dilòòlò edi ndituuta dímpè, dyà cyena-kalè, dyà Nyumà Mwímpè, dyà dyùmusha maalu à pa buloba ne bintu byà pa buloba. Ki cìdì cikèngelà Mpenta dilòòlò edi ncyôcì aci. Ki cìdì cikèngela nkawaka yètù dilòòlò edi, ndituuta dímpè, dyà cyena-kalè, dikùdimuna dyà ngôlò, too ne pàdì maalu à pa buloba ônsò àpàtuka munda mwètù, ne Yesù Kilistò ùdileeja.

<sup>88</sup> Ngììkalèku mêmè ànu ne dyanza dyà bantu edi mwab’ewu dilòòlò edi, batwibwe mushinga ànu menemene kùdì Kilistò, ne nsòmbelu yàbò milàmbula kùdì Kilistò. Ndi mwà kwenza byàbûngì ne dyanza edi, anyì Nzambì ùdi mwà kwenza byàbûngì, nànnku’s wè, ne dyanza dyà bantu dìdì mwaba ewu edi, kutàmba binùdi bafwànyìne kwenza ne Nsangilu mujimà wa Maèkèleeziyà wa Buloba bujimà, bwà Bukalenge

bwà Nzambi. Muntu umwèpelè mudìlambùle mu kabujimà mu byanza Byèndè, ki cyônsò cìdì Nzambi naaci dijinga.

<sup>89</sup> Kàdi, nudi numònà's, twêtù katwèna baswè kushààla bapùwe tuMulekela ùtuuta *elu* luseke, *lwàlwa* luseke to, kutònkola *eci*, kutònkola *cyàcya*, kutònkola *ewu* mmwènenu, ne *wàwa* *nakà*, ne kulekela Yesù Kilistò udileejila mu twêtù. Tudi tubandila sèndèma mipitèpítè bûngì. Tudi ne ndongamu yà ntèlèviziyo mipitèpítè bûngì. Tudi ne manayì makwàbò à pa buloba mapitèpítè bûngì, mu mùshindù wà ne èkèleeyiyà ùkaadi musaapùlùke kùdi bantu. Mbwalu Nyumà Mwîmpè ùdi ùpàtuka, ne cintu kampànda cikwàbò cìbwela. Ncyà bushùwà's, nwènù balundà bàànyì.

<sup>90</sup> Ndi ngùmvwa majaadiki, à beena Mpenta bàà cyenakale, müvvwàbò bènza masangisha a milòmbò bufùkù bujimà. Baatatwètù ne baamamwètù, kùkaadi bidimu makùmi ànaayi, makùmi àtaanu, bàsambilà bufùkù bujimà. Bantu bàvva bàbàkìna, mu müsèèsù. Kàdi twêtù tudi tudyàmbìdila, leelù ewu ne, bantu bônsò bôbò kabàyì bâtütuuta byanza pa dikaaya to, móna's, kùdi cintu cipampalàmùke mu twêtù. "Dyàkabi dyènù piìkalà bantu bônsò bààkula bîmpè bwènù nwènù." Yéyè uvwa mudyombola ne mubèngìbwè kùdi bantu, kàdi twêtù's tudi cimfwànyì Cyèndè. Amen.

<sup>91</sup> Cìdì cìtükèngelà leelù ewu mmasangisha kampànda à cyà bushùwà, mashùwashùwàlè à milòmbò, dikezudiibwa kampànda, kubangila ànu ku cyambiloo ne kùdi mulami wà ku ntempèlù, bikengela nzùbu mujimà kukezudiibwayè, kùdi Nzambi, kutuuciibwayè, kuleejayè Cimfwànyì cyà Mutuuci, Èvànjeeliyò ùyiishiibwa mu bukolè bwà dibìkà dyà ku lufù dyà Kilistò. Ncyà bushùwà.

<sup>92</sup> Ewu èvànjeeliyò mukesè wa nsòmbelu mulenga utùdi nendè matükù ônsò aa, ne kutuuta *ewu* nùnku cyanza pa dikaaya, ne kuvwija *ewu* nùnku mulami, ne *wàwa* nàka mukùlù, anyì cintu kampànda cikwàbò cyà mùshindù awu, byônsò bìbìdì ncìdììdì. Ki aci menemene cyàkenzekà ku Nicée, ku Loomo anyì? Tudi baswè kuumuka ku bintu abi. Ba-Méthodistes, ba-Baptistes, ba-Presbytériens, beena Mpenta, ne bônsò, tudi ne cyà kupàtuka mu cyôci aci.

<sup>93</sup> Cìdììdì kî ncyà mu Èkèleeyiyà to. Bidi bikèngela bwà Nyumà Mwîmpè àkookeshè Èkèleeyiyà, kàdi kî ndyela kampànda dyà tukàndà dyà cìdììdì dyà ne nganyì udi kampànda. "Nzambi mmutèèke mu èkèleeyiyà bàmwè bàpostòlò, bàmwè baprófetà, ne bàmwè balongeshi, ne batangadiki, ne bampaasàtà." Nkî mbantu babàsungulemù ku dyela dyà tukàndà nànsha. Nzambi ngudi mubatèèkemù, ku dibìkila dyà Nyumà Mwîmpè, masangisha à milòmbò, ne ditentekelangana dyà byanza, ne dishààlà dyà kumpàlè kwà Nzambi.

<sup>94</sup> Kàdi, leelù, tudi bawwijè ntèndeleelu wetù mushààle wa nsòmbelu mulenga mu mùshindù wà ne bïkaadi ànu bu cidiìdì, byòbì biinè, mutùdì tucyènza mu màngumba ètu ônsò. Tudi... Muntu këna mwà kufunda mukwèndè to. Tudi bônsò bapìile. Mwômò amu nudi nusanganamù ndambù wa balùme bashùwashùwàlè ne bakàjì bashùwashùwàlè. Kàdi lutàtu, cîndì mêmè ngeela meeji, tudi tutàmba kushààla ku lu—ku luseke lwà banyààbanyà, bantu bashùwashùwàlè bàdì baswè kwitabuuja ne baswè bukolè bwà Nzambi. Kùdi bapítèpíté bûngì babwejìibwe ànu ku cyenzedi cyà nsòmbelu mulenga ne: “Èè, ewu’s mmuntu mwîmpè. Mmuntu mulenga maalu.”

<sup>95</sup> Tudi ne èkèleeyiyà mîmpè. Tudi twibaka èkèleeyiyà mîmpè, ne èkèleeyiyà mîmpè kupità yitùvwà naayi pa ciibidilu. Byônsò abi's mbîmpè. Katwénakù naabì cilumbù to. Mêmè ntu muswè kumònà èkèleeyiyà ùtanta.

<sup>96</sup> Kàdi, mwanètù, mêmè ntu muswè kumumònà ùtanta mu bukolè bwà Mukalenge pamutù pàà kutancila mu bintu byà pa buloba. Alùkilaayi cyákàbìdì ku Èvànjeeliyò! Alùkilaayi ku bukolè bwà Nzambi! Alùkilaayi ku mpenta, ku...mùvvà wa ku cibangidilu amu. Kàdi, nudi numònà's, lutàtu lùdi ne, katùtu baswè kwangata dituuciibwa adi to.

<sup>97</sup> Udi mwà kwamba cintu pa bìdì bítàngila cintu kampànda, ne cintu kampàndà cyà nsòmbelu wa masandi cìdì èkèleeyiyà wènza, anyì—anyì cintu kampàndà cyà nsòmbelu mulenga, ànu pa dîbà adi bôbò bàmba bàkubènga, bàkàngà biibi. Kwêna mwà kubwela to, nwamònù's, bwalu bâdi benza cisangilu ne bàkukàngila biibi. Kabàciyi bakuswè kâbìdì to. Bâmba ne: “Udi mupâle. Üdi mujimije lungenyi.” Kàdi bu mùdìbi ànu ne ng’EMU MMÙDÌ MUKALENGE WÀMBA, cìdì muntu kanà yônsò ewu wàmba kacyèna ne bwalu kündì mêmè nànscha. Bidi bìkèngela bukolè bwà Kilistò bwà kushintulula muntu. Bidi bìkèngela bukolè bwà Kilistò bwà kulama muntu.

<sup>98</sup> Nènku ànu mwàkambà Yesù musangu kampànda ne: “Tàngilààyì bilòngò byà mbata. Kàdi Ndi nnwàmbila ne Solòmò, mu butùmbì bwèndè bwônsò, kààkavwàlakù bu cìmwè cyà ku byòyì to.” Solòmò, mu butùmbì bwèndè bwônsò, ùvwa muntu wa—wa mmwènekelu wa ûkòka ntèmà. Kakùyì mpatà to. Yèyè uvwa cintu cinènè kùdì bàà pa buloba, ne muntu munènè kumpàlè kwà Nzambi. Kàdi mùzàbì wà Solòmò kawùvvakù ne mwoyi munda mwàwù to. Civwa ncipesé cyà cilàmbà, pàmwápà cyenza ne myôsà myangacila pambidi pàà mùkòòkò. Kàdi, cilòngò cyà mbata cìvwa ne mwoyi.

<sup>99</sup> Cìdì cìtukèngela leelù ewu m'Mwoyi wà Kilistò munda mwètù. Aci ki cidi cìkezelù; kí ncidi mpambèlu, nshìngù wa nkoolù mukùdimuna, anyì dipòlomè dyà dimanya dyà bintu byà mu meeji, anyì cintu kampàndà to. Bidi bìkèngela bukolè bwà Kilistò mubiìke ku lufù bwà kutùvvija cìvwa cìkèngela

twêtù kwikala aci. Nzambi kàtu ne ndongamu mukwàbò to pa kuumusha wa kulekela Nyumà Mwímpè ûlombola ne ùkòòkesha mu Èkèleeyiyà.

<sup>100</sup> Kaa, Nzambi, Yéyè uvwa bikolè mu cimfwànyì cyà Nzambi, mu mùshindù wa ne Yéyè ne Nzambi bààkalwa Umwe. “Mêmè ne Taatù Wanyì tudi Umwe.” Kaa, ekèlekèle! Nnsòmbelu kaayi uvwaci, bwà Nzambi kusòmbela Yé munda Mwèndè, mu mùshindù wà ne mwoyi Wèndè wônsò wùvwa mujìngila mu Nzambi. Kabyèna bìkèmesha mùvvwàci mudimu mwowela byanza to!

Sàtaanà wàkalwa kùdì Ye.

<sup>101</sup> Musangu wônsò wùvvwà ànu Nzambi wèla meeji ne Ùvwa ne mudimu mwowela byanza, Sàtaanà ùvwa ùbwelamù. Wàkabwelamu mu Môsà, ne wàkashipa mikenji. Kàdi pààkalwàye kùdi ewu Mudimu mwowela byanza, aci cìvwa ndisungula dyà Nzambi yéyè mwinè. Amen. Ukaavwa—Ukaavwa mudyànjile kuMulongolola. Kacyàkamwenzela bwalu bwímpè nànsha bùmwè to. Yéyè wàkashààlè ne lulamatu kùdi Nzambi, pààkaMutàngilà Nzambi ne kumònà ne Wàkateeeciibwa munda mwà matùkù makùmi ànaayi mu cipèèlè, bu Môsà. Mu bushùwà bwà bwalu, bantu bônsò abu bàvwa bàMuleeja mu cindidimbì. Mikenji yìvwa yìshipiibwa. Kàdi pààkalwàye, Sàtaanà, mutècyanganyi munène awu, ne kuteetayè bwà kuMuteeta, wàkajandula ne uvwayè mupetè awu kàvvwa m'Môsà kuntwaku to. To, mukalenge. Wàkalengè ku nshinga wa volts binunu bitaanu yàkamwoshà mapwapwà èndè pààkatupikilàye Yéyè awu.

<sup>102</sup> “Bààkafunda ne,” mwàkambà Ye. Nwamònù anyì? Adàmà wàkapòna. Kàdi, Yesù, Adàmà mwibîdì, Mudimu mowela byanza wàkalwà awu, bu Mupikudi, Wàkamba ne: “Bààkafunda ne: ‘Muntu kààkwikala ne mwoyi ànu ku dyâmpà nkààyaadì to, kàdi ku Dìyì dyônsò dìdì dìpàtukà mukana mwà Nzambi.’” Ki Yéyè awu ne Mudimu mwowela byanza. Èyowà’s, mukalenge. Kwambayè cintu kampànda cikwàbò. Yéyè ne: “Bààkafunda kàbìdì ne: ‘Kuteeci Mukalenge Nzambi webè nànsha.’ Umùkà apa, Sàtaanà.” Ki Mudimu mwowela byanza ngwawù. Cyàkenzà Ye ncinyi?

<sup>103</sup> Kì nkwamba ne: “Nêngàmbìlè èkèleeyiyà wanyì. Nêngàmbìlè bakùlù bwà kwenzabò cikampànda. Mwèpiskòpò neënżè cikansanga” to.

<sup>104</sup> Yéyè wàkamba ne: “Bààkafunda ne.” Paanyimà pààci ki pàkateèkà Ye Adàmà Wendè wa kumpàla, kàdi kudishìndayè, ki Sàtaanà kucìnyangakajayè. Kàdi kàvvwakù mwà kunyangakaja Ewu nùnku to, cìvwàye mwenzè nànsha ciikàle cinyì. Mu mùshindù wà ne, too ne pàvvwàye...

<sup>105</sup> Nzambi wàkamba ne: “Ewu m’Mwan’Àanyì munanga. Mutèèlèjaayi Yéyè. Bintu byônsò, Ndi m’Mupèèsha Yéyè byônsò.

Nwêñù, nuMutèèlèjaayi.” Bâvwa Umwe. Bâvwa umwèumwè Awu. Nzambì ùvwa musòmbèle munda Mwèndè, ùMuvwija Nzambì, Èmanùwèlè, pa buloba. Yéyè ùvwa Mwânà wa mùkòòkò mupwàngànè, kaa, Mudimu mwowela byanza mupwàngànè wà bupikudi. Byàkasànkisha Nzambì, dîbà adi, ànu mùvvwà Michel Ange amu, Yéyè ùvwa musonsòdìlbwe bikolè kudi nsòmbelu Wendè. Tudi tusangana mu . . .

<sup>106</sup> Ndi ne Mifùndu mifùndu kaaba aka. Maakò 9.7, panwìkalà baswè kucìbala. Pàdi . . . M’Mukùnà wà Dikudimuka dyà mpàla. Pàvvwa Ye pa Mukùna wà Dikudimuka dyà mpàla, tudi tusangana ne kwàkamwènèka Môsà, ne kwàkamwènèka Eliyà.

<sup>107</sup> Nènku pa dîbà adi, katanci aka, mupostòlò Peetèlo kusonsodiibwayè bikolè, mu mùshindù wà wàmba ne: “Twibakè ntentà yìsàtù kaaba aka. Netwénzelè ànu malongolodi àsàtù ne cyôcì eci. Netwénzè màngumba àsàtù: dìmwè bwà Môsà, dìmwè bwà Eliyà, ne dìmwè bwèbè Wewè.”

<sup>108</sup> Pàcìcìvwàye àmu wàkula apu, dîyì kupàtukadì mu ditutu adi. Kwambadì ne: “Ewu m’Mwan’Àanyì munanga. Ndi musànkishiìlbwe bikolè Nendè, NêmMututè bwènù nwêñù. Mutèèlèjaayi Yéyè. Yéyè ngwíkala mwà kwakula.”

<sup>109</sup> “Wàkatàpiibwa mpùta bwà dishipa dyètù dyà mikenji. Wàkazaajiibwa bwà bubi bwètù.” Yéyè ùvwa Mwânà wa mùkòòkò, Mwânà wa mùkòòkò wà Nzambì, Mulàmbù mupwàngànè. Kacya kakùvvakù kwanjì kwikala muntu nànscha umwe ne nsòmbelu bu Yéyè to, kacya kakütukù kwnjì kwikala muntu nànscha umwe paanyimà pende ne nsòmbelu bu Yéyè to. Yéyè nguvwa Mudimu mwowela byanza mupwàngànè, ùvwa mwakànàngànè ne Dîyì dyà Nzambì.

<sup>110</sup> Nzambì ku cibangidilu wàkafila Dîyì Dyèndè, ndambù bwà eci citùpà cyà cikondo, bwà cyàcyà citùpà, bwà cyàcyà citùpà.

<sup>111</sup> Ki pôpò apu pàdì bantu baseeswìshììlbwe ne mu cibwejàkàjì cikolè leelù ewu. Bâdi bateeta bwà kwibakila pa cintu kampànda cyàkenzekà kùkaadi bidimu makùmi ànaayi, makùmi àtaanu. Tudi . . . Civwà, civwà cifidìlbwe bwà cikondo aci.

<sup>112</sup> Bivwa bifwànyìnè kwikala ne dikwàcisha kaayì kùdì Môsà bwà kulwa ne—ne mukenji wà Henòka? Bivwa bifwànyìnè kwikala ne dikwàcisha kaayì kùdì Môsà bwà kulwa ne—ne mukenji wà Noa? Bivwa bifwànyìnè kwikala ne dikwàcisha kaayì kùdì Yesù bwà kulwa ne—ne mukenji wà Môsà? Nwamònù anyì? Ne bivwa bifwànyìnè kwikala ne dikwàcisha kaayì kùdì Wesley bwà kulwa ne mukenji wà Luther? Bivwa bifwànyìnè kwikala ne dikwàcisha kaayì kùdì Mpenta bwà kulwa ne mukenji wà Wesley? Nudi bumvvwè cîndì muswè kwamba aci anyì?

<sup>113</sup> Yônsò mmikòsa mwab’ewu mu Bible, ne bidi bìkèngela bwà tûmanyè cikondo ne dîbà, ne cìdì bwètù twétù ncinyì. Ne pôpò apu ki patùdì tupangila leelù ewu. Tudi tubala bintu bikwàbò

byônsò pa kuumusha Bible. Edi nditùkù dìdì dìkèngelà bwà twêtù kwikala ne mwoyi. Edi nditùkù dìdì Nzambì mututèèkèle pànwapa. Tùtangilààyì mu Dîyì.

<sup>114</sup> Mùshindù awu ki wùdibo bápanga kumònà Yesù; Bâfaalèsà, ne Básadokà, beena Helòodè abu. Malongolodi mashìlèshìllàngàne à mu ditùkù adi àvwa macímànyìke mùshindù awu, ne macímànyìkilemu ànu menemene, kakùvwa mùshindù wà kucípangila to, mùvvwàbo bëèla meeji. Kàdi pààkalwàYe, kakùyi mpatà to Ùvwa...Ùvwa mushìllàngàne ne mùvvwàbo bôbò bônsò badyàmbidilaci. Ùvwa Muntu mukesè, mudipwekèshe muledìbwè mu cidilù cyà nyama, mwikàle ne...bàmucinkila ne m'Mwânà mulela mu masandi, ne bintu byônsò byà mùshindù awu abi.

<sup>115</sup> Kàdi, nànsha nànku, Yéyè wàkalwa menemene ànu mùvvwa Mifùndu myambè ne Yéyè neàlwè amu. Nènku bâkaavwa biibidìlangane ne civwa Mósà mwâmbe, kàdi pèndè Mósà mwakule Bwèndè. Yéyè ne: “Èè, bu ne nuvwakù bamanyè Mósà, nùnku’s nudi bamManyè Mémè. Mósà wàkaakula bwànyì Mémè.” Kàdi nànsha nànku bôbò kabàvvakù ànu mwà kucimònà to. Babwelàkànàngane mu bilèlè byàbò, mu mùshindù wà kabayikù mwà kucimònà to. Kàdi, nudi numònà’s, Yéyè kààkalwa bwà kuleeja malongolodi à ditùkù adi to. Yéyè kààkalwa bwà kuleeja ntèndeelù wa tusùmbù to.

<sup>116</sup> Wàkalwa bwà kuleeja Taatù, ne Taatù ùvwa Dîyì. Amen. Mpindyewu ngààlu kuumvwa bwena Nzambì bwàmbwedì. Wàkalwa bwà kuleeja Dîyì dyà Taatù. Nzambì ùvwa mwambè ne Yéyè ùvwa mwà kwikalakù, nènku’s ki Yéyè awu pwàà, Mudimu mwowela byanza mupwàngànè wà ku mudimu munènè wà byanza wà Nzambì. Kaa, ekèlekèle! Yéyè ùvwa cimfwànyì Cyèndè cipwàngàne. Ùvwa ùleeja byônsò bìvvà—bìvvà Nzambì mwambè. Ùvwa ùleeja cìvwà Adàmà mwambè Bwèndè Yéyè aci. Ùvwa ùleeja cìvwà baprófetà bônsò bambè, cìvwà bankambwà bônsò bambè. Byônsò byàkambàYe, Yéyè ùvwa dyula dyà Dîyì. Bifwànyikijilu byônsò byàkuula mu Yéyè. Èyowà. Wàkalwa Yehowàh wa Dipungila Dipyadipyà. Yéyè ùvwa Yehowàh wa Dipungila Dikùlukulu. “Dîyì musangu awu,” dìvvà mu Dikunji dyà Kapyà adi, “dyàkamwèneshiibwa ne dyàkasòmbela munkaci mwètù.” Yehowàh wa Dipungila Dikùlukulu wàkalwa Yesù wa Dipungila Dipyadipyà. Yéyè ùvwa cimfwànyì cipwàngànè cyà Nzambì.

<sup>117</sup> Kaa, bu Èkèleeziyà leelù ewu mwà kuleejakù ànu Èkèleeziyà wa kumpàla awu, pààkapwekà Nyumà Mwímpè mu Ditùkù dyà Mpenta apu! Bu mwena Kilistò leelù ewu mwà kuleeja’s wè! Twêtù’s tudi musùmbà musopakaja, pa kufwanyikija ne cìvwàbò bôbò aci.

<sup>118</sup> Mvwa mupicila, ngènda ndwa leelù ewu, mvwa mbandila, pâmvwà ndwa mwaba ewu apu, mpicila ku kàmwè kàà tu-

Casa Grande twà tukesè etu, anyì yìmwè yà ku myaba yà mikesè eyi, Mémè kumònà ne kùvwa bu—budimi bwà ndândà, ne lutende lushììleshììlàngàne. Bivwa bìkèngela kwikalabò ne moulin wà lupeepèle kuntwaku, bwà kupwìdija mâyì, bwà bikùnyìbwà abi kùtungunukabi. Bwà cinyì? Kí ncyà kwôkù aku to. Nànscha kakesè. Kàdi, tàngilààyì ntùlu wa kale awu, mvùla mmufwànyìne kubènga kulòka bidimu bítaranu kàdi yéyè mmufwànyìne kwikala ànu ne mwoyi. Kàdi wêwè mupangè kwelakù mâyì munda mwà matùkù makesè, s'nebifwe. Nudi numònà's, kí mbyà ku muji to.

<sup>119</sup> Mùshindù awu ki wutùdì twêtù. Bìkèngela kwikalabò bâtwèngeleka, ne bâtùvvija bantu banène mu èkèleeziyà, ne bâtùtuuta byanza pa makaaya, ne bâtubiìkila ne *cikampànda*, *cikasnsanga*, anyì *cikankènga*.

<sup>120</sup> Èè, beena Kilistò bàà ku cibangidilu abu bàvwa bakàyàbàle. Kabàvwa bacyùka ne nganyì uvwa ubàtuuta byanza paanyimà to. Bàvwa bâleeja Yesù Kilistò, bikolè menemene, mu mùshindù wà ne bàvwa bàmba... Bàvwa bàbàngata ne—ne bàvwa bapangi ne kabàyì balongè mukàndà to. Kabàvwa bayè mu cilongelu cibàndile to, ne kabàvwakù ne dìpòlomè dyà ku cilongelu citùmbuke to. "Kàdi bààkamònà ne bààkadi ne Yesù." Ki cìdì cibàkèngelà ncyòcì aci, beena Kilistò leelù ewu, bwà kumònà ne nuvwa ne Yesù. Kùdi cintu kampànda pa bìdì bikutàngila, ciikàle cishììlàngàne. Ndi mumanyè ne aci kí... Aci ncintu cìdì bantu kabàyì baswè to bwà kucyàmba, kàdi twêtu katwèna tukèba dimanyika nànscha. Beena Kilistò bôbò kabèèna bènda bàkèbangana ne cintu kampàndà cyà cipeepèle to.

<sup>121</sup> Mwanèètù wa bakàjì kampànda mukùlakàjì mu èkèleeziyà wanyì kùkaadi bidimu, ùvwa ne ciibidilu cyà kujuuka kwimba musambu ewu ne:

Bìdi bìkèngela bwà kwalukilabò naanyì  
kumbèlu ku Dyulu  
Pa bulààlù bwà maalu mapeepèle bulengeja ne  
bilòngò,  
Pàdì bakwàbò balwangàne mvitâ bwà kupeta  
difutu  
Ne bapìcile ne mâtu mu mbû yà mashi anyì?  
To, ndi ne cyà kulwangana mvitâ pììkalabi ne  
ndi ne cyà kukòòkesha.

<sup>122</sup> Anjì elabi meeji cyûvwàku mufwànyìne kwenza bu ne uvwa mwaba ewu ne maalu ônsò miikàle àbèngangana ne Yesù Kilistò, bu ne uvwa ne mwoyi mu matùkù Ènde awu. Wêwè's udimù ne mwoyi's, mwanèètù wa balùme, mwanèètù wa bakàjì. S'ncyà bushùwà. Yéyè's ùcidi ànu Dîyì. Tàngilààyì nùmònè mùdibo bàDidyatakaja ku makàsà leelù ewu. Tàngilààyì mùdibo bateeta kuDivwija bulongolodi, ne kuDisanga, ne byônsò byà mùshindù awu, ne maalu à pa buloba. Ikàlaayi biimànyìne pambèlu.

Angàtaayi—angàtaayi luseke lwà Yesù Kilistò ne Dìyì Dyèndè. Cintu nànsha cìmwè kacipangishikù aci to. Shààlaayi nwènù ànu naaDi.

<sup>123</sup> Byenzè mùvvwà musukudi wa bilàmbà wa kale wa ba-Chinois, uvwa ne ciibidilu cyà kulwalwalwa mu Arizona ne mu Californie emu awu, kùkaadi bidimu. Kàvwa mwà kufunda mwakù nànsha wùmwè wa mu Anglais to. Kàvvakù nànsha muyimanyè mene to. Paùdi umutwàdila bilàmbà byèbè byà disukula. Udi mumanyè cìvwàye wènza anyì? Ùvwa ne tupese tukesè twà mabèji, kapàyi pafunda kantu nànsha kàmwè to. Ùvwa ànu ùpanda kabèji aku ne ùkupèèsha kapese kàmwè. Paùdi walukila, bìvwa bikèngela bwà kapese kàà dibèji aku kàkumbanganè ne kèndè kapese kàà dibèji, cyanàànà kùvwa wangata bilàmbà byèbè bisukula abi to. Abi's mbitàmbe bwimpè. Udi mufwànyine kutentula dínà, kàdi kwàkumukütakajakù yéyè ku aci to, bwalu bìvwa bikèngela bwà kapese kàà dibèji aku kakùmbanganè menemene ne kèndè kapese kàà dibèji aku.

<sup>124</sup> Mùshindù awu ki wàkenzà pèndè Nzambi cipungidi Cyèndè. Kabyèna bikèngela bwà dilabula dyètù dikumbanganè ne twitabààyì kampànda, dìyì diswika kampànda, dingumba kampànda dyà èkèleeyiyà to, kàdi didi ne cyà kukùmbanganana ne Dìyì dyà Nzambi, Yesù Kilistò. Cyà bushùwà. Patùdì tulwa kùdì Kilistò, dìbà adi Kilistò ùdi ùtùnana. WàkaMupandulula mu bipese bìbìdì, ku Kàlvariyò. Cipese cyàcì Yéyè wàkacibàndisha, bwà kusòmbaci ku cyanza Cyèndè cyà dyàbalùme, cìvwà mubidi aci. Nyuma, Yéyè wàkalwa, mmwalùjìbwè pànwapa bwà kuMwenzela Mukaji-musèla. Ne bikèngela bwà dilabula dìmwèdìmwè dìvvwa mu Kilistò adi diikale munda mwètù.

<sup>125</sup> Kakùyi mpatà to Yéyè ùvwa—Yéyè ùvwa mupwàngànè mu mùshindù wà ne Wàkasànkisha Musongi wà mpingù awu, ne kuMusonsola bikolè mu mùshindù wa ne Yéyè wàkaMutuuta ku Kàlvariyò. Kaa, ekèlekèle! Mpindyewu tudi tuMumònà mùdì Mufundù mwambè, mudimu mwowela byanza wà Nzambi. “Tudi tuMumònà mutuuciìbwè, mutàpiìbwè, ne munyongàmijìbwè kùdì Nzambi.” Ki mudimu mwowela byanza mulelèlè ngwôwò awu. Ànu mwàkatuutà ’Ange wèndè amu’s, ki cyàkenzà ne... .

<sup>126</sup> Bu ne Yéyè ùvwa ànu ne nsòmbelu mwîmpè cyanàànà, nùnku Ùvwa mwà kwikala ànu bu bàmwè bàà ku bantu bàdi bàyiishà èvànjeeliyò wa nsòmbelu mulenga leelù ewu aba ne: “Yéyè ùvwa mupròfetà.” Ùvwa mupròfetà bushùwà, kàdi Ùvwa mutàmbe ne mupròfetà. Ùvwa Nzambi. Ùvwa Èmanùwèlè.

<sup>127</sup> Nènku mpindyewu cyàkaMwenzà ànu menemene, bwànyì mêmè, Mudimu mwo—mwowela byanza bwànyì mêmè ne bwèbè wêwè, mbwalu Nzambi wàkaMutuuta. WàkaMutuuta

ku Kàlvarìyò. Bu ne Yéyè kààkatuuuciibwa to... Nànscha byôbì ne Wàkabiìsha bafwè bûngì kaayì, nànscha Yéyè muyiishè bintu binène munyì, nànscha nsòmbelu Wendè mwikàle munène bishi, nànscha Yéyè mulàke mukana bishi, Yéyè's wàkajaadikiibwa mwaba awu. Wàkasankishiibwa, Nzambi's, mu mùshindù wà ne Yéyè ùvwa Muntu umwèpelè uvwakù mwimàne pa buloba uvwakù Nzambi mufwànyìne kutuuta bwà bakwàbò bwônsò. Mupwàngànè Awu wàkatuuuciibwa bwà bàvva kabàyi bapwàngànè. Bufùki bwônsò nkòòng bwàkadishinda abu, ku Adàmà, bwàkapikudiibwa mu Yesù Kilistò. Mudimu mwowela byanza wà Nzambi wàkatàmba diteeta bukolè. Mmunyì mwàkacyéñzà Ye? Ku Dîyì. “Bààkafunda ne: ‘Muntu kààkwikalà ne mwoyi ànu ku dyâmpà nkààyaadì to, kàdi ku Dîyì dyônsò dìdì dípàtukà mukana mwà Nzambi.’”

<sup>128</sup> Kaa, wêwè mulundà wanyì mwena Kilistò, vwàla byà mvitâ byônsò byà Nzambi. Kwíkadi wàlukila cyànyimà ne kaammwènenu kakesè kàà twitabààyì kampànda, anyì cintu kampànda cyûdì utwà nyama ku mikòlò aci to. Vwàla byà mvitâ byônsò byà Nzambi paùdì uya bwà kulwangana ne mwena lukunà, mwàkenzà Mukalenge wetù amu. Yéyè wàkaleeja müdi mwena Kilistò wa mutàmbe kwikala mutekète tékètèe mwà kucìmùna Sàtaanà ànu ne Dîyì nkààyaadì. Yéyè ùvwa ne makolè, Ùvwa mwà kwikala mutuutè Sàtaanà mu mùshindù kanà wônsò wùvvà Ye muswè awu, kàdi Yéyè kààkakwàta naawù mudimu to. Wakangata ànu Dîyì ne kumucìmuna naaDi. “Bààkafunda ne. Bààkafunda ne.” Myaba yônsò ne: “Bààkafunda ne.” Pa nànkú Yéyè kucímuna Sàtaanà ku Dîyì dyà Nzambi.

<sup>129</sup> Mpindyewu, awu nguvwà Mudimu mwowela byanza mupwàngànè ne Nzambi wàkaWùtuuta. Cìvwa ncileejilu kaayìpu's wè! Cintu cilelèlà kaayìpu's wè! Nwamba bwà kapese kàà-kàà lupìngù lwà Michel Ange kuntu kwàka, lwà Môsà lwàkatuciìbwà pa mukòlò alu anyì? Bible mmwambè ne: “Muntu ewu wàkayangakajiibwa kumutù kwà bantu bônsò. Wàkanyangakajiibwa bikolè mu mùshindù wà ne Kàvvwàkù nànscha mumwènèka bu mwânà wa muntu to. Wàkatuuiciibwa. Wàkazaajiibwa. Ùvwa ùzònza mashi. Wàkavùùdiibwa bilàmbà.” Yéyè... Cyônsò cìvwà cifwànyìne kwenjìibwa. Yéyè wàkamwèka ànu bu-ànu bu mushikì munène wà Mashi ne mifuba, byènda pàmwè. Kàvwa nànscha mene ùmweka bu muntu wètù ewu to, pàvwa Ye wenda ùcikòka ùbànda naaci ku Kàlvarìyò apu. Nzambi wàkaMutuuta bwètù twêtù. Ki cìdì cìMuvwijà Mudimu mwowela byanza mupwàngànè ncyôcì aci.

<sup>130</sup> Kaa, mùshindù mwinè wûndì muMunangè's wè, pa kumanya ne Yéyè mmungenzèle cyôcì aci, pa kumanya ne Yéyè mmukwenzèle cyôcì aci. Mmunyì mutùdiku mwà—mmunyì mutùvwàku bafwànyìne kukùmbànangana naaci? Muntu nànscha umwe kí mmufwànyinekù kukùmbànangana naaci to. Muntu nànscha umwe kí mmukùmbànangana naaci

to. Tuvwa pànwapa katùyi ditèkemena to. Twêtù katùvwa ne Nzambì to. Twêtù katùvwa ne mùshindù nànsha wùmwè wà bupikudi to. Yônsò wa kutùdi mulela ku disangila dyà mulùmè ne mukàjì, ne bivwa bikèngela ànu bwà twêtù kufuta mushinga awu. Kàdi Yéyè kulwa, mupwàngàne Awu, ne ùvwa mupwàngàne ne ùsànkisha mu mùshindù wà ne Nzambì wàkàMutuuta bwèbè wêwè ne bwànyì mêmè.

<sup>131</sup> Mpindyewu, munda mwà bidimu bitwè ku binunu bìbìdì, Nzambì ùdi ùteeta kuMusongela Mukàjì-musèla mudimu mwowela byanza, ùdibò bàbììkila ne ng'Èkèleelziyà. Ncyà bushùwà. Nzambì ùdi ùcyènza bishi? Ùdi ùcyènza ku ngenzèlù Wendè utu kàyi ùshintulukaku awu, Dìyì. Nzambì kàtu ùshintululakù ngenzèlù Wendè to. Muntu kana yônsò ewu, wêwè udi mwà kushintuluka. Udi ushintuluka. Mêmè ndi nshintuluka. Cikondo cìdi cishintuluka. Buloba bùdi bùshintuluka. Kàdi Nzambì kàtu ùshintuluka to, Yéyè mmupwàngàne. Yéyè kàtu ùshintuluka to. Ne mùshindù wùdîYe wènza cintu kampànda musangu wà kumpàla, Ùdi ùcyènza musangu wônsò ànu mùshindù wùmwèùmwè awu.

<sup>132</sup> Wàkasùngila muntu musangu kampànda bwalu muntu wàkanyingalala. Mùshindù awu ki wàsùngilàye muntu cyàkàbidi. Wàkondopa muntu kampànda bwalu ùvwa ne diatabuuja. NeOndopè wâlonda awu mwimànyine pa cishimikidi cìmwècìmwè aci. Yéyè kàtu ùshintululakù mùshindù Wèndè to, bwalu, nwamònou's, Yéyè mmudìshikàmìne ne Yéyè ngwa Cyendèlèlèlè. Kàtu ne mikàlù to, ùdi myaba yônsò, mmumanyi wa byônsò. Yéyè ùdi Nzambì. Nènku ki bwà cinyi kabyèna bikèngela bwà kulòmbaYe muntu nànsha umwe lungènyi to. Kabyèna bikèngela bwà kwindilaYe too ne pàdìYe ùyiila byàbûngì to. Kéna dijinga ne dipòlomè dipiyadipyà to. Yéyè mmupwàngàne. Nènku dipòlomè nî ndyà bishi, ne cintu nî ncyà bishi cidiYe wènza musangu wà kumpàla aci, dipàngadika Dyèndè dyà kumpàla dìdi dìshààla dìmwèdimwè adi bwà kashidi. Kadyèna mwà kushintuludiibwakù to. Kaa, mùshindù mwinè wûndì ne disànska's wè!

<sup>133</sup> Nènku pààkenzàYe mudimu Wèndè mwowela byanza wà kumpàla awu, Wàkamutèèka paanyimà pàà Dìyì. PààkenzàYe Mudimu Wèndè mwowela byanza mwibìdì, Yéyè awu ùvwa Dìyì. Amen. Ùvwa Dìyì; kàyi *paanyimà* pàà Dìyì to. Kàdi, Yéyè ùvwa Dìyì. Nzambì kàtu ùshintululakù ndongamu Wendè to. Ki cyôci aci menemene cyàkabangàYe bwà kwenza naacì èkèleelziyà Wendè wa kumpàla, Dìyì.

<sup>134</sup> Mpindyewu, Nzambì, Dìyì, ku cibangidilu, Ùvwa mudikàdile kùdi bakwàbò bônsò, bintu bikwàbò byônsò, bantu bakwàbò bônsò. Mpindyewu, ncyèna ne meeji à kwamba cyôci eci bwà kupangakana to. Nzambì mmusungulujanganyi. Nutukù bamanyè nànkú anyì? Nudi nwakula bwà dibwelakaja dyà bantu? Nzambì's ki musungulujanganyi. S'ncyà bushùwà ne Yéyè

ùtu ùsungulujangana. Ùdi ùtápulula cisàmbà Cyèndè ne bàà pa buloba. Wakatápulula Izàlèèlè, ditunga Dyèndè. Ùdi ûteeta kutápulula èkèleeziyà Wendè ne bàà pa buloba, kàdi èkèleeziyà mmuswè kutùngünuka ne bàà pa buloba. Kàdi cisàmbà Cyèndè cìdi ànu cisungùlùjìibwe, cisungùlùjìibwe kùdiYe. Yéye ùdi Nganyì? Dîyì.

<sup>135</sup> Mmunyì mùdìku muntu mwà kwikala ne dibàtiiza dyà Nyumà Mwímpè, ne Nyumà Mwímpè ngudi mufunde Dîyì, kàdi muntu kwikala ne dibàtiiza dyà Nyumà Mwímpè kàdi kuvila Dîyì adi? Mmunyì mùdìku Nyumà Mwímpè munda mwèbè mwà kuvila Dîyì Dyèndè Sungasunga dyàkafidibwà bwèbè wèwè? Ncyéna mwà kucyùmvwakù to. Bikèngela cipetanganè ne Dîyì. Ne nyumà wèbè udi munda mwèbè awu kàyi muswè kutwà "amen," ku mulayì ne mulayì wônsò wà Nzambì kùdi cintu kampànda cipampàlámùke.

<sup>136</sup> Mwanèètù Fred Sothmann anyì muntu kampànda kaaba aka dildòlò edi, ùvwa mutèèlè ne: "Yesù Kilistò umwèumwè awu makèèlèlè, leelù, too ne kashidi." Yéye ùdi Dîyì. Aci, cyà bushùwà. Yéye ùdi misangu yônsò ànu umwèumwè awu, nwamònou's, ne bikèngela bwà nyumà wèbè àtwe "amen" ku cyôcì aci.

<sup>137</sup> "Kaa, Yéye, mu mùshindù kampànda Yéye ùdi nànku." Mu mùshindù wônsò, Yéye ùdi umwèumwè awu makeèèlèlè, leelù, too ne kashidi.

<sup>138</sup> Mpindyewu tudi tumòna ne Nzambì wàkabanga kuDyènzela Mu—Mukàjì-musela bwà Kilistò. Pa nànku...Ne Mukàjì-musela awula ùdi ne cyà kufwànyikijiibwa Nendè ne munda Mwèndè, bwalu ncitùpà cyà ku Yéye. Mpindyewu, Mukàjì-musela ùdi citùpà cyà ku Yéye. Ùdi citùpà cyà ku Yéye. Dîyì bwà ditùkù adi, Mukàjì-musèla ùdi ùlwa citùpà cyà ku Dîyì adi, bwalu n'Kilistò. Mpindyewu, nudi nwitatuuja nànku anyì? Bikèngela twìkalè mu Kilistò. Mu Kilistò, bikèngela twìkalè bàà Kilistò, mu Kilistò, citùpà cyà ku Kilistò.

<sup>139</sup> Mukàjì ncinyì, pàdiye wàngata mulùme, anyì mulùme pàdiye wàngata mukàjì? Bidi bikèngela bwà mukàjì awu ikalè citùpà cyà ku yéye. Kabacyéna kàbìdì bàbìdì to. Bàdi umwe.

<sup>140</sup> Nènku pààkashààla Nzambì ne Kilistò umwe, Bàvva Umwe. Bwalu, Nzambì ùvwa Dîyì, ne Dîyì dyàkavwijiibwa mubidi. Mubidi ne Dîyì byàkalwa Umwe. Nènku pàdi èkèleeziyà ùlwa Mukàjì-musèla wa Kilistò, Yéye ne maÈvanjeelìyò bidi cintu cìmwè.

<sup>141</sup> Mmunyi mùdì mwà kwamba, dîbà adi ne: "Matùkù à bishìmà àkaadi mamanè kupità"? Mmunyì mùdìku mwà kwamba, dîbà adi ne: "Yéye kêna umwèumwè awu makèèlèlè, leelù, too ne kashidi"? Mmunyì mùdìku mwà kwamba ne: "Bintu abi bidi bwà mùpostòlò anyì bwà muyidi kampànda, anyì muntu kampànda mu ditùkù dikwàbò," pèèbè mwikàle citùpà cyà ku Yéye?

<sup>142</sup> Pààbi's, Yéyè wàkamba ne: "Maulu ne buloba nebìjiminè, kàdi Dìyì Dyànyì kadyàkupangilakù to." Kàdi bishi bwà Bwàkabuulwibwà 22, pààkajikijà Ye kufunda Mukàndà awu apu? Wàkamba ne: "Ndi njaadika ne muntu yéyè ànu musàkìdile dìyì dimwèpele, anyì muumùshileKù Dìyì dimwèpelè, cyèndè citùpà necyùmushiibwè ku Mukàndà wà Mwoyi."

<sup>143</sup> Mmuniyì mutwìkalàku mwà kufika mu Dyulu, dìbà adi, bwà kwamba ne: "Èè, mémè ndi ngiitabuuja *cikampànda*, kàdi ncyêna ngiitabuuja Aci to?" S'bidi bikèngela bwà wikalè Dìyì mu kaabujimà, bwalu udi citùpà cyà ku Yéyè. Ki mùdì Nzambi ùteeta kwenza Èkèleeziyà Wendè leelù ewu, kí nku twitabààyì kampànda to. Kàdi bôbô bàdì bâteeta bwà kutubweja ku bukolè mu cyôci aci, balùmyànà wa yààyà. S'nudi mwà kucimònà cilwa. Mufundù wùdì ku cimanu. Kabyàkunèngakù to katuyì bashààle Èkèleeziyà wa buloba bujimà. Nènku èkèleeziyà ne èkèleeziyà yônsò neikalè ne cyà kakùluka ànu mu cyôci aci, Bwà cyanàanà neàtwale maalu ikalà mwà kwenzeka awu. Èè, nudi badilongòlòle bwà kuàtwàla anyì? Bìvwa bitàmbe bwîmpè nwénù kubènga kucyènza ànu ne bwalu nudi nwela meeji ne ncintu cîmpè.

<sup>144</sup> Bìvwa bitàmbe bwîmpè bu wêwè mwà kwikala ne Kilistò munda mwèbè, bwalu Dìyì adi ndyà Cyendèlèèlè, ne Dìyì adi ki dyàkubìishà ku lufù. Udi ulwa citùpà cyà ku Dìyì adi. Udi mufwànyikijìbwè ne Dìyì.

Leelù ewu, udi wamba ne: "Mêmè ndi mwena Kilistò."

<sup>145</sup> "Udi wa mu dìngumba kaayì?" Èè, aci kacyèna ne bwalu nànscha bùmwè ne bwena Kilistò to.

<sup>146</sup> Bìdi ànu bîmpè bwà kwikala ne màngumba. Ncyêna naaci cilumbù to. Kàdi, nwamònù's, aci, ki cidi bantu... Bantu bààbûngì bâtu bàmba ne mémè ndi mpandakaja màngumba, ngàtwa misèbà. Kí ncindi ngenza to. To, mukalenge. Màngumba awu, s'àdi ànu bîmpè. Aci cidi ànu mùdì mèyì à dyumvwangana bwà mudimu, anyì cintu kanà cyônsò cyà bwena aci. Kàdi paùdì ulamata, bwalu udi wamba ne: "Mêmè ndi mwena Kilistò bwalu ntu wa mu èkèleeziyà *kampànda*," aci kacyèna ne cîdici cyùmvwija to. Bìdi bikèngela wikalè wa Kilistò, ne Kilistò n'Dìyì. Ne misangu yàbûngì màngumba awu atu kule ne Dìyì ànu mùdì Esètè kule ne Wesètè emu.

<sup>147</sup> Bikèngela ùshaalè ne Dìyì adi, bwà kwikala Mukàjì-musèla. Pawikala mu Mukàjì-musèla, udi mu Dìyì, ne Dìyì dìdi munda mwèbè. Ne Dìyì dìvwà dileejè Nzambi munda mwà Kilistò adi, dìdi dìleejà Nzambi umwèumwè awu munda mwèbè. Amen. Amen mbwena kwamba ne "biìkalè nànkú." Pa nànkú, biìkalè nànkú. Mêmè ndi ngiitabuuja ne m'Bulelèlè. Bikèngela ûfwanyikijìbwè Nendè.

<sup>148</sup> Mpindyewu, byôbì bikèngela bwà mêmè kwikala mwena Àmèrikè mulelèlè ne mushùwashùwàlè, byôbì bikèngela bwà

mêmè kwikala mwena mwàbò mulelèlè wa ditùngà edi, Bìkèngela ngììkalè mufwànyìkìjìibwe naadì. Bìkèngela ngììkalè cyônsò cìvwàdikù aci, címpè anyì cibì. Bìkèngela ngììkalè cyônsò cìdìdi, címpè anyì cibì; cyônsò cììkalàdi aci, címpè anyì cibì. Bìkèngela ngììkalè mufwànyikìjìibwe ne ditùngà edi, byôbì bìkèngela bwà ngììkalè mwena Àmèrikè. Mmwômò anyì? Mu butùmbì bwèndè anyì mu bundù bwèndè, mu budììkadidi anyì mu kapyà, cyônsò cìdìye aci, ndi ne cyà kwikala mwenji wa dibènga-kufwà dyèndè. Ndi ne cyà kwimana bu cimùku. Cyônsò cìdìye aci, ki cìndì. Cyônsò cìvwàye aci, ki cìndì. Cyônsò cììkalàye aci, ndi ne cyà kwikala mwabanyanganyi nendè. Ncyà bushùwà.

<sup>149</sup> Anji elààyì meeji pa bwalu abu bwà katancì kakesè. Dîbà adi, bwà kwikala cyôcì aci, bu mwena Àmèrikè... Nênnùfikìshìlèci, bwà nwénù kwikala batwîshìibwe bwà kucìmòna, pânkaadì njikija apa.

<sup>150</sup> Bwà kwikala mwena Àmèrikè, bìkèngela ngììkalè mufwànyìkìjìibwe ne cyônsò cìkaadiyekù mwenzè aci. Dîbà adi, ngâkiimana pa Lubwebwe lwà Plymouth apu, pàmwè ne—pàmwè ne bankambwà abu. Mvwa nsanganyiibwa ku Lubwebwe lwà Plymouth alu ne beena Lwendu abu. Mvwa naabò kuntwaku. Ngâkabànda pa kabalù pàmwè ne Paul Revere, bufuku kampànda, bwà kudimwija ditùngà edi ku njìwù yàdì. Bìvwa bìkèngela bwà mêmè kwikala nànku, bu ne mvwa mwena Àmèrikè.

Wêwè udi wamba ne: “Kaa, Mwanèètù Branham!”

<sup>151</sup> Indìlà kakesè. Bible mmwambè, mu Ebèlù nshapità wa 7, ne: “Lewì wâkapeta byàdiikùmi awu, wâkafuta byàdiikùmi, bwalu ùvwa mu mifungu yà Abraham pààkatwilanganàye ne Melekisedekè apu,” tatwèndè wa tawèndè wa tatwèndè, ne bààkamubadilaci. Pàvvà mwânà wa mwânà wa mwikùlwèndè mulùme mu mifungu yèndè, pààkafutà Abraham byàdiikùmi kùdi Melekisedekè apu, Nzambi wàkacyàbanya. NcyàkenzàYe anyì? Ncyà bushùwà.

<sup>152</sup> Cyônsò cìdì ditùnga edi aci, ki cìndì. Ncyà bushùwà. Pa nànku, ngâkiimana pa Lubwebwe lwà Plymouth alu. Ngâkabànda pa kabalù pàmwè ne Paul Revere.

<sup>153</sup> Ngâkasabukila mu cibandabanda cyà Valley Forge, mvwa pa musùlù wùvvà mukwàte dibwe dyà mashika awu pàmwè ne George Washington. Mvwa umwe wa ku bàsàalaayì bàà beena Àmèrikè bàvvà kabayì ne bisabaatà ku makàsà abu, bwà kakùngamangana ne ba-Britanniques. Mvwa ne makàsà makwàte mashika mu dìndà adi, pangààkàjìngìlà bilàmbà ku makàsà apu. Ngâkàmòna Washington ùpàtuka mu cipèèlà, mubolè bolebole, too ne mu cimôno, ùfumina ku disambila bufùkù bujimà. Mvwapù pààkenzekàci apu.

<sup>154</sup> Ngâkiimana pàmwè ne Stonewall Jackson, pààkavulà dikàndameena apu. Pààkatùmà bilwili byà ku nord abi mukenji, bôbò kwamba ne: “Bilwili byônsò byăshìikidi.”

Awu ne: “Jackson ùdi penyi?”

<sup>155</sup> Bôbò ne: “Mmwimàne bu cimanu cyà mabwe.” Mvwa mwimàne pàmwè nendè kuntwaku; kakwàcikwètù, kanyìikanyì wa mùncyonci, kàà mèsù à bleu aku.

<sup>156</sup> Bààkamukonka musangu kampànda ne: “Mmunyì mûdìku mwà kushààla kacya wîmana pàdì dikàndameena dinène mùshindù awu?”

<sup>157</sup> Muntu mutàmbe kupwekela awu, kutuutayè cisàbaatà cyèndè cyà mbuma aci pânshì, mùshindù ewu, kwambayè ne: “Mêmè ncyêna ngeelakù mâyi à kunwà mukana mwànyì emu, pândì nciyi musàkìdila Nzambi wa Bukolè bwônsò to.” Ngâkiimane nendè mu bìvvàye wìtabuuja ne ki mùdìbi abi. Ngâkiimana pàmwè ne Stonewall Jackson. Ncyà bushùwà.

<sup>158</sup> Mvwa ku Dimanhà dyà Cyayì dyà ku Boston adi. Ngâkambulwisha bwà kwimansha cîmwè cyà ku Cyayì cyà ba-Britaniques aci mu mbû. Bìvwa bikèngela mêmè kwikalà nànku, bwà kwikalà mwena Amérikè. Èyowà’s, mukalenge. Èyowà’s, mukalenge. Ngâkatwà cyâlâ pa Dîyì dyà Budishikaminyi, pàmwè ne Thomas Jefferson. Ngâkeela Ngonga wa Budìkkadidi, mu dyà matükù à4 à ngondo wa mwandamutekète, wa cidimu cyà 1776.

<sup>159</sup> Ndi mufwànyìkjìibwe mu bundù bwèndè bwà ditomboka, pàvwa muntu ùlwangana ne mwanààbù, ne taatù ùlwangana ne mwanèndè mulela. Bìkèngela ngìikalè mufwànyìkjìibwe mu bundù bwèndè, byà mwomùmwè ànu mûndì mufwànyìkjìibwe mu butumbì bwèndè amu. Ncyà bushùwà menemene.

<sup>160</sup> Mvwa ku Wake Island pààkafwà bàsàlaayi bônsò apu. Ngâkabàmòna bâfwa. Ngâkabàmòna pààkakwàtâbo Wake Island apu. Ngâkambulwisha ku dibàndisha dyà dìbèndelà mu Guan. Ncyà bushùwà menemene.

<sup>161</sup> Cyônsò cìvwàye, ne cyônsò cikààdiyekù mwenzè, cyônsò cìdiye mpindyewu aci, ndi ngàmba ne maleela ônsò ne mêmè ndi citùpà cyà ku yéyè, bwalu ndi ne disànta dyà kwikalà mwena Amérikè. Kàdi wéwè?

<sup>162</sup> Bwà kwikalà mwena Kilistò, ndi ne cyà kwikalà mùmwèmùmwè amu. Àlèluuyàh! Èyowà’s, mukalenge. Piìkalàbi ne ndi mwena Kilistò, dîbà adi’s ngâkayiisha Èvanjeeliyò ne kudìmwija bantu bwà manyooka àvvà àlwà, pàmwè ne Noà. Èyowà’s, mukalenge. Mvwa citùpà cyà cyôcì aci, mwômò amu. Mvwa citùpà cyà ku cibùcilu cyà Nzambi.

<sup>163</sup> Mvwa pàmwè ne Môsà ku cipuka cìvwà cìlàkukà kapyà aku. Ngâkiipaciibwa mu Ejiipitù pàmwè ne Môsà. Ngâkanyeema bimpàmbâmba mu cipèela amu, ne mvwa nendè ku cipuka cìvwà

cilàkukà kapyà aku. Ngâkumuvwa dîyì Dyèndè. Ngâkamònà butumbì Bwèndè. Ngâkamònà Dikunji dyà Kapyà mu kaacipuka mwàmwà, dìyiikilangana ne Môsà.

<sup>164</sup> Mvwa nendè ku Mbû Mukùnze pààkakàngukàye apu. Ngâkamònà Dikunji dyà Kapyà dishikama pa Mukunà wà Sinààyì. Ngâkadyà manà mu cipèèlè ne kunwà mâyì ku lubwebwe lutuuta alu. Àlèluuyàh! (Ncyêna ndyùmvwa bu udi ne bidimu makùmi àtaanu ne bitaanu mpindyewu mene to.) Amen. Èyowà's, mukalenge. Ngâkadyà manà mu cipèèlè, pàmwè ne bânà bàà beena Ebèlù mu cipèèlè mwàmwà. Ne ngâkanwà mâyì ku lubwebwe lutuuta lùmwèlùmwè alu.

<sup>165</sup> Ngâkiimana ne Yoshùwa mu dîndà adi pàvvwàye wènda ùkenketa bimanu byà Yelèkò, ne kumònayè Muntu mwimànè apu. Kupàtulayè mwele wèndè wa mvitâ awu mu cimànga ne kuyayè lubilu bwà kutwilangana Nendè. Kwambaye ne: "Wéwè ewu udi bwètù twètù anyì. Udi ne mwena lukunà wetù anyì?"

<sup>166</sup> Awu ne: "Mêmè ki Kàpîteenà kàà cilwilu cyà Mukalenge." Ngâkamònà Yoshùwà wèla mwelè wèndè wà mvitâ awu pansi. Ngâkatwà binù pansi pàmwè ne Yoshùwà pângààkiinamà pansi kumpàlè Kwèndè, Kàpîteena kàà Mukalenge kàà cilwilu Cyèndè. Ngâkamònà bimanu byà Yelèkò byùpuka, ku mwadi wà mpungi.

<sup>167</sup> Ngâkamònà Yoshùwà, wàmba ne: "Wéwè dîbà, imànàkànà kaaba kàmwè. Ne, wéwè ngondo, imànà pa Ajàlònà. Kùnyungukù to." Ngâkamònà dîbà dìimana tèndé, kàdi ngondo yéyè kàiyikù ùpangila bwà kufila bukènkè bwèndè to. Ngâkamònà byônsò abi byènzekà.

<sup>168</sup> Mvwa ne Danyèlè mu bwinà bwà ntambwe; mvwa ne bânà bàà beena Ebèlù abu mu cikütù cyà kapyà.

<sup>169</sup> Mvwa ne Eliyà, kuntwaku pààkamubèngà buloba bujima apu, ne Aakàbà ne ba-Izàbèlè bààbò bônsò abu ne nsukì yàbò mibebula ne bintu byà ditükù adi, bilaabu byàbò byà kwîsù ne mpùtùlû, byônsò byàkawàtè èkèleeyìyà abi. Ngâkiimana ne Eliyà, ngàmba mukenji mukezùke ne wà kazeze awu, pa Dîyì dyà Nzambi. Àlèluuyàh! Ngâkashààla nendè pa Mukunà wà Kaamèlè pààkiimanàye nkàayendè kuntwaku apu. Ngâkamumònà ùsambilà ùpwekesha kapyà kafùmìnè mu dyulu.

Mvwa ne Davìdì pààkashebeyàye Goliyàtà apu. Butumbi kùdì Nzambi's wè!

<sup>170</sup> Èè, piikalàbi ne ndi mwena Kilistò, s'ndi mufwànyìkijìbwé mu byônsò abi. Bìkèngela ngììkalè citùpà cyà ku byôbì abi. Èyowà's, mukalenge.

Ngâkamba cipròfetà pàmwè ne Yeshààyì mu ditükù dyèndè.

<sup>171</sup> Mvwa ne Yone mu Yadènè pààkamònàye nyuunyi wa nkuci ùpweka pambidi Pèndè apu. Mvwa mwimànè ne Yone ku Yadène aku.

<sup>172</sup> NgâkaMumònà wòndopa babèdì; ùbìisha Lazàrô ku lufù; ùbìisha mwânà wa bakàjì wa Yayìlò awu wàlukila cyàkàbìdì ku mwoyi, paanyimà pàà yéyè mumanè kufwà. Ngâkamònà cyôcì aci.

<sup>173</sup> Ndi mufwànyìkìjìbwè Nendè mu lufù Lwèndè. Ngâkafwà Nendè pààkafwàYe ku Kàlvariyyò apu, ne ngâkabìika Nendè ku lufù mu dìndà dyà Paasàkà adi, mu bukolè bwà dibiìkà Dyèndè dyà ku lufù. Mêmè ndi ntèmù wacì dilòòlò edi. Ngâkafwà Nendè ku Kàlvariyyò, kubiìka Nendè dyà Paasàkà adi. Àlèluuyàh! Bwà kwikala citùpà cyà ku Yéyè, bikèngela mfwanyikijiibwè Nendè. Ngâkafwànyikijiibwa Nendè mu lufù Lwèndè. Ngâkafwànyikijiibwa Nendè mu kukèngà Kwèndè. Ngâkafwànyikijiibwa Nendè pààkaMubèngàbo kùdì màngumba apu. Ngâkafwànyikijiibwa Nendè pààkaMupàtulàbo mu ntempèlù, pààkateetàbo bwà kuMwela pambèlu, kutàpuluka Nendè apu. Mvwa Nendè mwaba awu. Mvwa Nendè mu lufù Lwèndè, kubiìka Nendè ku lufù mu dibiìkà dyà ku lufù.

<sup>174</sup> Ne mvwa ne bantu lukàmà ne makùmi àbìdì abu pààkabàndàbo mu cibambalu cyà kuulu apu. Èyowà's, mukalenge. Ngâkadimwèna cipeepèlè cyà cìvuma aci cifùmina mu Dyulu. Ngâkaakula mu myakulu pàmwè ne bààkalaabiibwà mu Ditùkù dyà Mpenta abu adi. Àlèluuyàh! Mvwakù bwalu ndi mufwànyikijiibwè Nendè. Butùmbi kùdì Nzambi's wè! Nyà bushuwà. Ngâkayiisha ne Peetèlò, mu Byenzedi 2. Kaa, ngâkayiisha nendè kuntwaku.

<sup>175</sup> Ngâkayiisha ne Pôlò pa Kakùnà kàà Mars, kumpàlà kwà badyudi. Èyowà's, mukalenge. Bìvwa bikèngela ngììkalèku.

<sup>176</sup> Mvwa ne Yone mu Cisanga cyà Paatèmò. Ngâkamònà cikèènà-kumònà cyà Dilwa Dyèndè. Ki cîndì mmònà eci. Ngâ–ngâkamònà Luther. Mvwa nendè pàvvàye mu dilongolola apu.

Mvwa ne Wesley.

<sup>177</sup> Kàdi mpindyewu ndi mùneemu mu Yuma, mu Arizona. Àlèluuyàh! Ndi mufwànyikijiibwe dilòòlò edi, mu Cilààla-beenyi cyà Stardust eci, ne kasùmbù kàà bantu bàdi bìitabuujà cintu címwècímwè eci. "Nènku mpindyewu tudi basòmbe pàmwè mu myaba yà mu Dyulu mu Kilistò Yesù." Àlèluuyàh! Ndi mwindìle Dilwa Dyèndè mu butùmbì, dimwè dyà ku matùkù àdi pansiì aa. Mufwànyikijiibwè Nendè!

Mu kwikala ne mwoyi, Yéyè wàkannanga; mu  
kufwà, Yéyè wàkansùngila;  
Mujiikiibwe, Yéyè wàkangata mpèkaatù yànyì  
è kuya kayishiya kule;  
Mu kubiìka kwà ku lufù, Yéyè wàkambingisha  
cyanàànà bwà kashidi:  
Dingà ditùkù Neàlwè–kaa, ditùkù dyà  
butùmbi's wè!

<sup>178</sup> Ndi mpindyewu mufwànyìkìjìibwe mu dibàtiiza dyà Nyumà Mwímpè; kaciyi cintu kampànda pambèlu apa mu mùsèesù emu, cyà kúkaadi bidimu makùmì ànaayi to. Ndi naacì mpindyewu mene, butùmbì ne bukolè bwà Nzambì, bwà difwìdiiibwa dyà luse ku mpèkaatù. Ndi mMumòna wòndopa babèèdì, ùtàbeeja mèṣù à mpofo, mMumòna ùdyànjila kwamba maalu, ùbala mu myoyi yà bantu. Ndi mufwànyìkìjìibwe Nendè mu mudimu Wèndè wa bwambi mu ditùkù edi. Butùmbì kùdì Nzambì's wè! Ndi mufwànyìkìjìibwe Nendè, bwà disùngidiibwa mu ditùkù dyà ndekeelu edi. Ndi mutwishiibwe ne ndi citùpà cyà ku Mukàjì-musèla munène udi ulwa dìmèwè dyà ku matùkù àdi pansiì aa.

<sup>179</sup> Bâà pa buloba nànsha bambè cinyì, bâdi mwà kutùbìikila mutùdi “bapâle, bajimije lungènyi, anyì ba-Beelèzèbùlà, anyì bapàmbùkè,” cyônsò cìdìbo baswè kwikalà aci. Ndi ànu muswè kwikalà mufwànyìkìjìibwe ne kasùmbù aku. Ncìcìdi ànumù. Ndi nshààla ànumù. Mwômò amu ki mündi muledìibwe. Ndi muswè kushààlamù. Nêngìkalè misangu yônsò ànumù, bwalu Nzambì mmunteèkemù. Ki mündi. Ngâkashiya èkèleezìyà wanyì, bwà kulwa kudifwànyikija ne musùmbà wà bansantu babìnguluki bâà mu malaba. Mêmè ndi umwe wabò. Ndi mufwànyìkìjìibwe naabò.

Bôbò bâdi bàmبا ne: “Billy, udi mujimije lungènyi.”

<sup>180</sup> Pàmwàpa mvwa mulùjìmije's, kàdi ngâkapeta meeji à Kilistò. Ndi mupetè Dîyi Dyèndè, mupetè Bwikadi Bwèndè, musangàne ne Yéyè ùdi umwèumwè awu makèèlèlè, leelù, too ne kashidi! . . . cìdì muntu mukwàbò kanà yônsò wèla meeji pa bwalu abu nànsha ciikàle cinyì. Ewu mmêmè. Mêmè ngudi ne cyà kwenza difwànyikijiibwa dyànyì. Ndi mufwànyìkìjìibwe Nendè, ku Dîyi dyà Nzambì. Mmwambè ne: “Bimanyinu ebi nebìfilè aba bâdi biñtabuujà.” Ndi ne disànka mündi mufwànyikijiibwe mu cyôci aci. Eyowà's, mukalenge.

<sup>181</sup> Nudi bamanye's, mwimbi wa kale mupilùke wà cîndaalà awu, musangu kampànda, nukàadi bumvwé bwalu abu, bâvwa ne cîndaalà cyà kale cyèdiibwa mvwàndù, bâvwa baswè kucisùmbisha, kàdi muntu kàyikù muswè kucisùmba to. Bôbò kwamba ne: “Nganyì udi muswè kufila ndola umwe? Nganyì udi muswè kufila ndola umwe ne citùpà?” Ndekeelu wa byônsò ne: “Kwamba musangu umwe, misangu yìbìdì, ndola umwe ne citùpà.”

<sup>182</sup> Ndekeelu wa byônsò muntu mukùlakàjì kampànda wa mvya ku mutù kupàtukayè mu batèèleji amu. Nudi bamanye bwalu abu. Kucyàmbùlayè, wàmبا ne: “Nganjìbi kucitwa byanza.” Kulaabayè màfutà ku mucì wàcì awu, kàdi kwanjiyè kucituuta katancì kakesè. Bantu kàdi asààyi myadi's. Binsònji kubangabì kubàpwekelà ku matàma, mùshindù ewu.

<sup>183</sup> Ne pààkenzàbo nànkù, ki mweleshi wa mvwàndù awu kubangulayè cyàkàbidì, kwambayè ne: “Nganyì udi mwà

kwela mushinga,” wàmba ne, “wà ndola cinunu, binunu bìbìdì, binunu bitaanu?”

<sup>184</sup> Dishìlangana dìvwa dyà cinyì? Mwimbi mupilùke, uvwa mucìmanyè awu, uvwa mucisongè awu, nguvwa mumanyè mwà kupàtulamù cintu cìvwà cìsinganyiibwamù.

<sup>185</sup> Nènku patùcìdì ànu tuteeta bwà kupàtwila èkèleeziyà yètù ku twitàbabàyì ne màngumba, katwàkwangulakù mpasu nànsha. Lekèlaayi Mwibaki Mupilùke wa bukwàbantu, Wâkenza muntu mu cimfwànyì Cyèndè sungasunga awu, Udi munkaci mwà kuMwibakila Mukàjì-musèla bwà cintu cìmwècìmwè aci awu, nshinga Wendè wa disèngeleela wa Nyumà Mwímpè awu àdìdinge ànu àtuutè Dìyì edi munda mwà mwoyi wèbè musangu wùmwè, ne cyôcì aci's necììkalè cileejilu cyètù cyà citàmbe bwímpè. Nànsha wèwè uya mu èkèleeziyà yà minène bûngì kaayì, ne nànsha ménà bûngì munyì mafunda mu mukàndà wà ménà, necyènzelè Yesù Kilistò byàbûngì kutàmba èkèleeziyà yônsò ayi, ne màngumba, ne twitabààyì ayi, ne èkèleeziyà yà pa buloba, ne malongolodi, pa buloba bujimà.

<sup>186</sup> Ùdi munkaci mwà kwenza Mukàjì-musèla. Èyowà's, mukalenge. Ùdi wènda ùlamuna tuplesa atu mpindyewu, wènda ùtuula maalu à pa buloba. Kaa, diya kashààla wa mu èkèleeziyà, ne twitabààyì, ne màngumba, ne mèyì maswìka, byónsò bìdi ne cyà kusònjiibwa ku Èkèleeziyà; mmwènenu yàbò yà bintu byà kwísùkwísù ayi, dibènga kucyùkà dyàbò dyà maalu adi, malongesha àbò awu ne bikwàbò. Alùkìlaayi nûlekelè Mulongeshi mupiluk'awu àmbulè mucì wà cindaalà awu. Mulongeshi awu àkubàkùlè mu byanza Byèndè, àtuutè Dìyì, àmbè ne: “Yesù Kilistò ùdi umwèumwè awu makèelèlè, leelù, too ne kashidi.”

<sup>187</sup> Ambà ne: “Amen, Mukalenge. Ngenzèku, mfwìmbèku, ngenzèku, Mukalenge, cìvwà cikèngelà bwà mémè kwikala aci.” Dibà adi nekwìkalè cintu cishiìllàngàne.

<sup>188</sup> Dibà adi: “Mêmè mubàndishìbwè muumùke pa buloba, Nênkokè bantu bônsò kûNdì.” Èyowà's, mukalenge.

<sup>189</sup> Ùdi munkaci mwà dikusonga mpindyewu, ùkupempa ùkushiya Dìyì Dyèndè nkàayaadi, ùkòsa twitabààyì yônsò ne mèyì maswìka ne bikwàbò byónsò, ùbyumusha kûdì, ûteeta bwà kwaluka ku Mukàjì-musèla bwà Mwânà, mukwàbò mudimu mwowela byanza, citùpà cyà ku Dìyì. Dìyì's.

<sup>190</sup> Yesù kàvwa mwà kwangata kaaba aku to. Nudi bavùlùke pààkabalàbo ditùkù adi mu mukàndà awu anyì? Wàkabala ànu katùpà kàà cipròfetà aci, kushìya cìvwà cishààle aci bwà matùkù à ndekeelu. Twétù mbàdì ne cyà kwangata citùpà aci.

<sup>191</sup> Pa nànkú, nudi numòna's, Yéyè mmukòse, muswè kukòsa kupàtula Èkèleeziyà, ànu mwàkapàtulàYe Mwânà amu, ànu mwàkenzàYe Mukàjì-musèla ne Mubàki amu. Bwà kwikala Mukàjì'Endè-musèla, wèwè udi ne cyà kwikala citùpà cyà ku

Yéyè. Kí ncitùpà cyà twitabààyì to, kí ncitùpà cyà ku èkèleeziyà to, kí ncitùpà cyà ku dìngumba to, kàdì ncitùpà cyà ku Yéyè. Kàyi musongela pa cintu cyà kwísùkwísù cyà mùshindù mukwàbò kanà wônsò to, kabyàkukùmbànakù to. Bìkèngela úsongiibwè pa Dîyi. Maalu a pa buloba makòsa muumusha kûdi, ne kushìya ànu Dîyi nkààyaadi ne mwoyi munda mwèbè.

<sup>192</sup> Musongi munène awu mmukutékémène wêwè, bwa wànyishè bwà kwimana ne kudifwimbisha mu difwànangana dyà dilòmbà Dyèndè dìdì Dîyi Dyèndè dilòmba. “Mu matùkù à ndekeelu Néngiïcikijè Nyumà Wanyì pa mubidi wônsò. Bânà bëènù balela bàà balùme ne bàà bakajì nebämbè bipròfetà.” Kilistò ki Mudimu mwowela byanza mumanyishiibwe wa Dîyi divwijijiibwe mubidi. Wêwè udi mulòmbiibwe bwà kufwànyikijiibwa mu Yéyè, ku Dîyi dìmwèdìmwè adi, bwà kwikala mudimu mwowela byanza bwà Mukàjì-musèla.

<sup>193</sup> Mpindyewu, bânà bëètù, Nzambì ùvwa ne mudimu mwowela byanza cikondo aci, wà kuleeja kùdì bà pa buloba, mpindyewu Üdi ùkèba mudimu mwowela byanza leelù ewu. Udkù muswè anyì? Udi mudìlongòlòle anyì, mulundà wanyì mwena Kilistò? Udi mutwishiibwe cyà bushùwà ne nsòmbelu wèbè ùdi menemene ùleejiibwa bwà Kilistò, nànscha bàà pa buloba bambè cinyi anyì. Bàdi bàmبا ne: “Wajìmiji lungènyi. Wabùluku. Udi mukashààle wa mu musùmbà wa bansantu babùngùluki bàà mu malaba awu.” Kwikadiku utèya ntèmà aku to.

<sup>194</sup> Wêwè kùyi bulelèlà musùngìdìibwe, ne mu Mubidi awu, ne Dîyi dyà Nzambì munda mwèbè ne diDileeja Dyôdì diinè, ne Mwoyi wà Kilistò ùdileejila munda mwèbè; mwanèètù wa balùme, mwanèètù wa bakajì, kwìkadikù unàya ne mudilu nànkú awu to. Cyûdì nànscha ciikàle cinganyì, nànscha wêwè mwenzè malabula à mùshindù kaayì awùdi naawu, lekélà Dîyi adi didilèejile mu wêwè ditükù dyônsò, bwalu Nzambì, mu matùkù à ndekeelu aa, ùdi wàngata Mukàjì-musèla bwà Mwânà Èndè, Yesù Kilistò.

Twinyikààyì mitù yètù.

<sup>195</sup> Taatù wa mu Dyulu munanga, mùshindù muumàkàne nùnku ewu kumpàla kwà musùmbà wà bantu bàà meeji. Dilonga dyànyì dyà kàlaasà ndikùmb... kî ndikùmbànè to, Mukalenge. Ndi ndòmba bwà Nyumà Mwîmpè munène awu abwejèku mèyì aa mu myoyi yà bantu, bwà bààfikakù ku dimònà címvwà muswè kwamba aci, bu bôbò kabayì mwà kuumvwakù mu wànyì mùshindù wà disùnsulula bintu to, Mukalenge. Kàdi, munda mwà mwoyi wànyì, ndi—ndi mmònà cyÙdì—cyÙdì uteeta bwà kwenza.

<sup>196</sup> Ndi ngiitabuuja, Taatù, ne Mukàjì-musèla ùdi ne cyà kwikala citùpà cyà ku Mubàki. Üdi ne cyà kwikala ànu wa mwomùmwè ne Mubàki, bwalu ùdi citùpà cyà ku Yéyè. Kénàku nànscha bìshi, nànscha bìshi mwà kwikala MukàjìÈndè-musèla

to pàdiye kàyi mulwè citùpà cyà ku Yéyè. Nènku ncitùpà cyà ku Dîyi, leelù ewu, dìdì dyàmba ne Yéyè ùdi umwèumwè awu makèèlèlè, leelù, too ne kashidi aci.

<sup>197</sup> Lutete lwà blé lùvwàku ne mwoyi musangu kampànda wàwa pa buloba alu, ne lumatè mu buloba, lwàkajuuka mu difwànangana ne lutete lùvwa luyè mu buloba alu. Nènku, Mukalenge, mu Ditùkù dyà Mpenta kwàkapàtuka Èkèleeziyà munène. Kwàkalwa lutete lukwàbò lwà blé, bwà kuvwijibwalù Mubàki ne Mukàjì-musèla bwà ditùkù dyà ndekeelu.

<sup>198</sup> Twêtù kusangana ne, lwàkadishìnda, bwèndè Yéyè, munda mwà bidimu cinunu. Kuumukila ku nsangilu wa ku Nicée, luvwa lushàale lwènda lùbola mu buloba.

<sup>199</sup> Badyudi kufundabò mukàndà ne, *Nzambì Mupùuwe*, “Uvwa mufwànyine kulekela bânà bakesè bàfwa, ne bàshebeyiibwa kùdì nyama yà ntambwe, ne bòòshiibwa awu. Ne bashipyanganyi bàà mu dicyònkomojanga bàvwa bàshipà beena Kilistò bwà diitabuuya, ne babòoshela pa makunji à dyoshelanganakù.” Bu muntu awu nànsha mwà kwikala ne dyumvwa dyà nyumà’s!

<sup>200</sup> Bikèngela bwà blé awu àbolè mu buloba amu, kàdi ûvwa ùtòloka cyàkàbìdì, kàyi mu difwànangana dyà mùvvwàye tuyè mu buloba amu to. Ùvwa ùya mu buloba mu difwànangana ne lutete lwà blé, kàdi, pààkapàtukàye, ûvwa ne ndambù wa tubèji, bu mùdì blé mutekète udi ùtòloka awu.

<sup>201</sup> Ndekeelu wa byônsò kukolayè, kuumukila ku Luther too ne ku Zwingli, ànu nànkú, ne ndekeelu wa byônsò kufikayè ku mwepu. Wàkadishintulula mu matùkù à Wesley. Citamba kufwànanganaku kakesè ne blé, ne kufwànanganana nendè kutàmba mùvvwà tubeji amu. Ùdi wènda wàlukila cyàkàbìdì ku yéyè mwinè.

<sup>202</sup> Pashiishe tudi tusangana ne, lùdi lùbànda, lutete, lwàmba kufwànangana ànu ne lwà lulelèlè alu. Nènku wêwè ànu muswè kuya ne kuuvula cizubu aci, neùjandulè. Lutete lwà kumpàla lwà blé alu kalwèna ne lutete munda mwàlù amu to, nànsha kakesè. Ncizubu, dibèji. Mukalenge, ditàbuluja dinène dyà beena Mpenta dyàkapàtuka adi, bìvwa bikèngela kwikalabi mùshindù awu, Mukalenge, bwà kukùba Blé awu pààlwàye bulelèlè. Kakùvwakù kufwànyine kwikala mwaba wà Yéyè kuya to.

<sup>203</sup> Mpindyewu, Taatù, tudi bamanyè ne tudi twangacila bintu byônsò ku bufùki, bwalu Wêwè ngutu mwenzè bufùki. Wewè wâkapikula buloba: ku mùshindù Uwàkabùbàtiiza, mu matùkù à Noà, paanyimà pàa kuiisha kwèndè; Wêwè kumacisha Mashì a Mwânà pa buloba, bwà kubùjidila bwèbè Wêwè mwinè; ne mu cikondo cinène cícilwalwà, mu divwijulula dyà bintu bipyabipiyà, Wêwè neùbwôshè bwônsò ne kapyà, bwà kwosha kubùtula bintu byônsò byà pa buloba. Ànu mÙdì wenza ne mwena Kilistò amu, Udi umusùngila: umubàtiiza; umujidila;

pashìishe umuumusha maalu à pa buloba mu kumuvwija mupyamùpyà, ne ùmunana dîbà adi bu webè Wêwè, mu kutèèkà kwà Nyumà Mwîmpè munda mwèndè.

<sup>204</sup> Tudi bamanyè ne blé ewu mmupicile ku nshintùlùkìlù umwèumwè awu. Bufuki bwônsò bûdi bùkwàta mudimu müşhindù wùmwèwùmwè awu. Mpindyewu, Mukalenge, patùdî tumòna cizubu mpindyewu munkaci mwà kulamunuka ne Lutete alu, cìya müyaayà bâà pa buloba, Éyì Nzambì, enzàku bwà ntete ayi yàmònakù... Bikèngela bwà ci—cizubu aci cilamunukè, bwà lutete lùmonè mwà kubwela mu Bwikadi bwà Mwânà. Ndi ngumywa dilwa dyà katùmba kâà dinowa naakù aku, Mukalenge. Kakwàkunèngakù to. Ne pashìishe cibàndishi cinène aci necyàmbulè Mukàj'Endè-musèla mu butùmbi, mu Bwikadi bwà Nzambì.

<sup>205</sup> Ndi ndòmba, Taatù, bwà Wêwè kubèneshakù yônsò wa kutùdî. Tùvulukèku, Mukalenge, ne ewu ki wetù mpungà. Tudi mwà kwikala katùyi nendè mâàlabà to. Leelù ki wetù mpungà. “Leelù ewu, paanyimà pàà cipòòlò cile nùnku, panùdi nuumvwa Dîyî Dyèndè, kanùpapishi myoyi yènù to.” Mukalenge Nzambì, mêmè necyêna mumanyè bantu aba to. Kwôkù muntu kampànda mwaba ewu, mupangile cyôci eci, enzàku dilòòlò edi bwà àpetà kaabujimà kâà Nzambì, ne ùjiibwè tènte ne Nyumà Mwîmpè. Enzàku nànku, Taatù.

<sup>206</sup> Mpindyewu ne mitù yètù miinyika, myoyi yètù miinyika, kàbìdî. Balundà bâànyì, mfwilaayikù luse bwà wànyì müşhindù wûndì nkòsolola mukenji wànyì. Ndi—ndi ndòmba bwà Nzambì ànuleejèku ànu cimvwà mêmè muswè kwamba aci. Mpindyewu, piikalabi ne... Neyêna muswè bwà muntu ikalè mutàngile to. Lamà ànu mutù wèbè awu mwinyika. Neyêna mumanyè to. Nànscha wêwè mwikàle nganyì, pawikalà kùyi mutwishiibwe ne mwoyi wèbè...

<sup>207</sup> Mpindyewu, nwamòn'u's, yônsò wa ku nshintùlùkìlù ayi, cyàkenzàbò ncinyì? Bâàkabwela mu bulongolodi kampànda. CyàkenzàYe ncinyì? Nyumà ùwwa ùmuka, ùya kùdi mukwàbò. Luther mmwenzè ànu udìvvija bulongolodi; kukabwelaYè buludì mu Wesley. Wesley kudìvvijayè bulongolodi; kukabwelaYè buludì mu Mpenta. Mpenta wâdivwijì bulongolodi; kùyaayàYe mpenyi? Ànu mùvvà Dikunji dyà Kapyà amu, útùngunuka ànu ne kwenda kuya.

<sup>208</sup> Kàdi bàmwè bantu, bâdi bàmba ne: “Mêmè ndi mwena Mpenta.” Abi's bìdi ànu bîmpè. “Mêmè ndi Luthérien.” Abi bìdi ànu bîmpè. Kakwèna cilumbù nàsha cimwè pa bwalu abu to.

<sup>209</sup> Kàdi, mulunda wanyì, mulundà wanyì, Blé's ùcidi ànu útùngunuka ne kwenda kuya. Tudi bapetè dimwè dyà ku matàbuluja à matàmbe bunène. Dikaadi—dikaadi dinènge ditàmbidila. Maalu-malonda àdi àleeja ne ditàbuluja ditu dinènga bidimu bitwè ànu ku bisàtu cyanàànà. Edi dyenjì

bidimu dikùmi ne bìtaanu, anyì bipìte apu, tÙmpanyè tunènè twà dyondopa, kàdi patùdì twakulangana apa dyákwaçì mashìka. Tàngilààyì! Ditàbuluja dyônsò dìtu misangu yônsò ànu dìpàtula bulongolodi paanyimà pààdì. Bwà cinyì edi dyôdì kí ndipàtùle bulongolodi? Kùdi kasùmbu kakesè kàà bânà bëètù kàdi kabangè, mùneemu mu mwaba kampànda, kàbìikidiibwa ne Mvùla Mishììshe, kabèèna ne kùdibo bayè to; s'bìmànyì. Bwà cinyì? Ncikondo cyà Blé, balundà bâànyì. M'Blé. Kùdi mudimu wà bwambi pa buloba mufwànàngàne ànu menemene ne wàkayà mu buloba kale wàwa ku cibangidilu awu, dilabula dilelèlè dyà mpenta.

<sup>210</sup> Èkèleeziyà yìkaadi yènda yìdivwija malongolodi. Ne umwe ùdi ûteeta bwà kwibaka citanda cinène kutàmba cyà mukwàbò, ne kupeta bidimba bitàmbe bûngì ne bikwàbò, malongolodi, ku kakesè ku kakesè. Tudi tucimònà. Mêmè's ndi mwena mpenta. Tudi tucimònà ciditapulula. Kàdi ncinyì? Bikèngela cyénzé nànkú, bwà—bwà bukènkè bwa Mwânà bwàmònà mwà kufika ku Lutete. Bu ne kacivwamù to, dyàmbedi, bu ne kakùvwakù cizubu cilùjìngile to, kalùvwakù ne mwaba wà kuyalù to. Nzambì wàkacyènzelà cizubu, nwamònù's, ànu mùdì ditalà, ànu mùdì blé, ànu mùdì cintu kanà cyônsò cìdì cìpàtukà mu mpoopu amu. Mpindyewu, nwamònù's, kakwènakù bulongolodi nànscha bùmwè bubangìle paanyimà pàà cyôcì eci to. Bwà cinyì? Kakwèna kàbìdi dìbà bwà bulongolodi to. Tukààdi ku ndekeelu.

<sup>211</sup> Nènku wêwè kùyi ànu menemene pàvvàbi bìkèngela bwà wêwè kwikalà to, ne wêwè mufwànyìne kwamba ne: "Mwanèètù Branham, bu Nzambi mwà kuumvwakù disambila dyèbè bwà babèèdì, bwalu nkààdikù muumvwè bìdi Mukalenge mwenzè mu dyandamuna ku disambila . . ." Nènku nukààdi bumvwè bwà bantu bakwàbò pa buloba leelù ewu ne, bâdì munkaci mwà kusambilà. Udi wamba ne: "Ndi . . . Udkù mwà kunsambidila, bwà ngâpetakù dilabula adi anyì, Mwanèètù Branham? Ndi mwà kupanga kukumònà cyàkàbìdì." Ndi mwà kupanga kukumònà. "Kàdi sambilàku bwà mêmè kwikalàmù. Ncyéna ànu ndyùmvwa bu ne ndi mufwànyìne kwikalàmu mpindyewu to. Kàdi ndi njinga bwà ùnsambidilèku, bwà ngíkalamù."

<sup>212</sup> Mpindyewu, mutù wônsò mwinyika. Elà cyanza muulu, udikù mwa kuswa anyì? Mukalenge àkubènèshè, àkubènèshè, ne wêwè. Nzambi ànùbènèshè. Mu kasùmbù kàà bantu aka, ngeela meeji, makùmi àtaanu, pàmwàpa, anyì byanza makùmì mwandamutekètè ne bìtaanu bìvwa byela muulu.

<sup>213</sup> Mpindyewu, Yesù Munanga, Wêwè ngudi mulumbulwishi. Twétù tudi ànu bambi cyanàànà. Ndi ndòmba, Nzambi Munanga. Nènku—nènku pângìllàku mupetè ngásà ku mèsù Kwèbè, andàmùnàku disambila dyànyì. Wêwè wamònà cyanza cyônsò cyédiibù muulu. Wêwè ngudi mumanyè cìvwà mu mwoyi wàbò. Tudi twitatuuja ne bôbô mbalongolwela Mwoyi. Kàdi Sàtaanà, ànu mwàkadibi matùkù à Adàmà, ùdi munkaci mwà

kuteeta bwà kupangisha mudimu mwowela byanza awu bwà kupàtukawù patòòke. Swàku bwà cìimanyikijiibwè dilòòlò edi. Swàku bwà Mashì à Yesù Kilistò àcímànyìkè, ne swàku bwà bàlwé kùdì Nzambì bu mudimu mwowela byanza. Enzàku nànku, Taatù.

<sup>214</sup> Swàku bwà bàfwànyìkijiibwè mu Dîyì dyà Kilistò. Yéyà wàkamba ne: “Muntu yéyè kàyi mulediìlbwe cyàkàbìdì...” Swàku bwà bapetè dilabula dyà dilediibwa dyà cyàkàbìdì adi. Swàku bwà bapetè dibàtiiza dyà Nyumà Mwímpè, divwiijiibwa dyà bintu byônsò byà pa buloba bipyabipyà. Kí mbabiswe kàbìdì to, Mukalenge. Básukùlèku ku maalu à pa buloba awu, ne bápàtùlèku bu mudimu mwowela byanza kumpàlè kwà bantu. Enzàku nànku, Mukalenge, bwà Wamònakù mwà kwikala ne disànka mu cikondo cyà lupangu lwà bikùnyìlbwa mu matùkù a ndekeelu aa eci, bwà kuleeja mudimu Webè mwowela byanza wà balùme ne bakàjì aba, bâna bàà balùme ne bàà bakàjì, bàvvwa balamè byanza byàbò muulu abu. Enzàku nànku, Mukalenge.

<sup>215</sup> Bèneshàku ditàbuluja didì munkaci mwà kwenzeaka mu cimenga emu edi. Éyì Nzambì wa yààyà, ndi ndòmba bwà mulùme yônsò ne mukàjì yônsò, udi pabwípì awu, àfikèku ku ditàbuluja adi. Ne swàku bwà yônsò wa kùdìbo ùjiibwè tèntè ne Nyumà Mwímpè, ne kwènzekèku ditàbuluja dyà cyena-kale dyàtangalakà mu kaacimenga aka mwaba ewu, mu mùshindù wà bantu bàà ku myaba yônsò bàlwá. Enzàku nànku, Mukalenge. Tùpèshèku bintu ebi, Taatù, bwalu tudi tubilòmba mu Dînà dyà Yesù. Amen.

<sup>216</sup> Ndi muMunangè. Ndi muMunangè. Nudi baMunangè anyì? Nudi bamanyè's, Pôlò wàkamba ne: “Mêmè ngimba, ndi ngimba mu Nyumà.” Ndi ndikònka. Mêmè ndi kule be ne kwikala kangimbà. Kàdi ndi ànu ndìkonka, bônsò pàmwè, ní katwènakù bafwànyìne kubanga musambu awu, *Ndi MuMunangè*. Udikù mwà kutùpeesha cyonà anyì, mwanièètù wa bakàjì? “Bwalu Yéyè wàkannanga kumpàlè.” Nukàadi bacyúmvwè. Mbanganyì bâdi bawùmanyè? Tùmonààyibì byènù... Ngùmwè wà ku misambu yànyì yà kale. Ntu munangè kuwimba. Éyò.

<sup>217</sup> Mpindyewu twinyikààyikù ànu mitù ne tùbwitààyì kwísù, twimbààyi mpindyewu, *Ndi MuMunangè*.

Ndi muMunangè, ndi muMunangè  
Bwalu Yéyè wàkannanga kumpàlè  
Ne wàkampetela lupàndu  
Pa muci wà Kàlvariyo.

<sup>218</sup> Tùwimbilaayaaku mu matàma. Dîngà ditùkù myanzankòngòlò neyítangalakè mu dyulu emu. Nekwìkalè mwadi wà mpungi. Bafwè mu Kilistò nebìikalè munkaci mwà kulwa. Kaa, mùshindù mwinè utwàCìjingà díbà adi's wè!

Ne wàkampetela lupàndu  
Ku Kàlvariyo.

<sup>219</sup> Kwôkù aku ki kwàkalwàYe Mudimu mwowela byanza bwètù twêtù.

<sup>220</sup> Vùlukààyì ànu ne, midimu myowela byanza yônsò, kumpàlà kwà kuteèèkiibwayiku mu cibambalu cyà luumù, bìkèngela yänjì kupìcila mu cibambalu cyàbò cyà badyudi, dyàmbedi. Bìkèngela badyudi bàmonè ní bádi mwà kuwùdyula. Kàdi pàdìwu ùtàmba badyudi, díbà adi bádi bàwùbwéja mu cibambalu cyà luumù. Mwânà wa Nzambì wàkapìcila kùdì badyudi bàà bulongolodi ne bulongolodi bwônsò, dìngumba ne dìngumba dyônsò, mu mùshindù wà Pilaatu wàmba ne: “Ncyêna mpeta cilèmà nànsha cìmwè mu yéyè to.” Yudààsà kwambayè ne: “Ndi mutungile Mashi àdì kaàyì menzè bubì to.”

<sup>221</sup> Dibà adi ki Nzambì kumubìisha Yé ku lufù, ne Yéyè mmukùdika mu cibambalu cinènè cyà luumù leelù ewu, ku dyàbalùme dyà Nzambì, mwikàle wàkwilangana. Kanwenaayikù baswè kalamakanamù Nendè anyì? Kanwènaayiku baswè kwikala citùpà cyà ku cyôci aci anyì? Udi mwà kwikala nànkú. Udi mubiìkidìbwé bwà kwikala nànkú. Patùdì twimba musambu ewu apa, bwà cinyì kùyikù uciyikilangana Nendè mpindyewu.

... wàkannanga kumpàla  
Ne wàkampetela lupàndu  
Pa mucì wà Kàlvariyò.

<sup>222</sup> Patùdì tuwìmba cyàkàbìdì apa, ndì muswè bwà ùlabulèku muntu kampànda ku cyanza ku luseke lukwàbò lwà mèèsà alu mpindyewu. Ambà ne: “Nzambì àkubènèshè, mulundà wànyì mwena Kilistò. Nzambì àkubènèshè. Nsambìdilèku.” Yônsò wa kunùdì énzèku nànku awu mpindyewu, patùdì twimba cyôcì eci cyàkàbìdì apa.

Ndi                    munangè . . . (Nsambidilèku.  
Nsambidilèku.) . . . muMunangè  
Bwalu Yéyè . . .

<sup>223</sup> Ncyà bushùwà, labùlàngànaayi ku cyanza, nwāmbè ne: “Nsambidilèku.” Nwènù bônsò nùnsambidilaayikù. Ndi muswè kwikalamù, ne mwànyì mwônsò.

Ne wàkampetela lupàndu  
Pa mucì wà Kàlvarìvò.

<sup>224</sup> Mpindyeuwu twinyikààyì mitù yètù ne tubwitààyì kwîsù, ne twélaayi byanza byétù muulu bwà tuMwimbilaayiwù mpindyeuwu.

Ndi... (Éyì Nzambì!) ndi muMunangè  
Bwalu Yéyè wàkannanga kumpàla  
Ne wàkampetela lupàndu  
Ku Kàlvaryò.

Tàngilààyì Mudimu wènù mwowela byanza awu  
mulembèlèlè kwàka.

<sup>225</sup> Musongi munène wa mpingu, Nzambi munène Wâkenza muntu, ne kumufwîmba ne kumuuvwija mu cimfwànyì Cyèbè sungasunga, Ndi nKulòmba, Mukalenge, bwà Ùtwângâtèku dilòòlò edi. Swàku bwà eci cììkalè dilòòlò dyà civùlukilu, dyà divùluka menemene kutùdì, ne, dilòòlò edi, Mukalenge, dilòòlò edi, ànu mwab’ewu mene mu Cilààla-beenyi cyà Stardust emu, swàku bwà Ùfwimbè bantu mu cimfwànyì cyà bânà bàà Nzambi. Enzàku nànku, Mukalenge. Musongi munène, Wêwè ki Umwèpelè udi mwà kucyènzà. Angâtàku Dîyì Dyèbè, Mukalenge, ùDifwimbilè munda mene mwà myoyi yètù bônsò, bwà twamònakù mwà kwikala midimu Yèbè myowela byanza mu matùkù à ndekeelu, ne kubììkìdììbwà ne Mukàjì-musèla wa Kilistò. Bakwàbò bantu bâdikù mwà kumònà ne kùdi bulelèlà bwà menemene ne disàンka mu diikalà ne mwoyi Bwèndè Yéyè.

<sup>226</sup> Mukalenge, mu ditùkù edi, mùdì nànsha èkèleeziyà yètù mene, biikàle munkacì mwà kujimija meeji àbò matoòke. Kabèèna... Mbimwèke bu ne, byônsò bikaadi bishààle Hollywood, Mukalenge, cìdì cyenzèke ncinyi's? Mbayè bènda bâlonda di—dibàlakana pamutù pàà dyela nsèsà. Tudi bamanyè ne buloba bùdi bùbàlákana ne bwena tusùmbù twà pa buloba. Kàdi Èvànjeeliyò ùdi wèla nsèsà ne dinanga ne Kilistò. Enzàku, Mukalenge, bwà twamònakù mwà kuumuka ku dibàlákana dyà buloba, ne kubwela mu dyela dyà nsèsà dyà Kilistò.

<sup>227</sup> Mbèèbè Wêwè, Mukalenge. Wêwè ngwâkabàsùmba. Wêwè... Bèdì byanza muulu, dilòòlò edi, bâvwa baswè kwikala nànku. Mpindyewu, Taatù, ndi... Bu ne mvwakù mufwànyime kucyènza, mvwa mwà kubàvwija cyôcì aci, kàdi ncýéna mwà kucyènza to. Kàdi ndi nkweyemena Wêwè. Wêwè wâkamba ne: “Ewu udi ulwa kûNdì ncýàkumwipatakù to nànsha byà munyì. Ewu udi umvwa Dîyì Dyânyì ne witabuuja Ewu udi muNtùme, ùdi ne Mwoyi wà kashidi, ne kààkupìcilakù ku Cilumbulwidi to,” kadi kàyi ùdìngidija bu udi witabuuja to, Mukalenge, kàdi witabuuja, “yéyè mmuumùke ku lufù tuyé ku Mwoyi.” Enzàku nànku, Taatù. Mbèèbè Wêwè, mu Dînà dyà Yesù Kilistò. Amen.

<sup>228</sup> Nudi baMunangè anyi? Yéyè kî mmulenga wa dikèma anyi?

<sup>229</sup> Tupèèshèku kaacikèmù kakesè tûng, anyì cyonà mwaba awu, mwanèètù wa bakàjì, *Mukèmeshanganyi*, *Mukèmeshanganyi*.

Nutu baswè kwimba anyi? Ndi nnwàngata mukÙngìlù mupitèpìte bule anyi?

<sup>230</sup> Mêmè ntu munangè kukuukwila. Kàdi nwénù? KaaDiyiisha kakesè, kàà kàtâpa müşhindù ewu, ncýéna... Nudi bamanyè's, mêmè ntu mukîne kutâpa. Kàdi, udi, udi ne cyà kupoopela musonso ne kuwùbùnyina mu dibaya, bwà kukwàtawù. Nudi bamanyè cíndì muswè kwamba aci. Eyowà. Bikèngela uwùbwnejè wônsò mpindyewu. Kàdi nwamònú anyi?

<sup>231</sup> Nudi banangè musambu awu anyì? “Mukèmeshanganyi, mukèmeshanganyi, ki cìdì Yesù bwànyì mêmè.” Nudi bawùmanyè anyì?

Mukèmeshanganyi, mukèmeshanganyi, ki cìdì  
Yesù bwànyì mêmè,  
Mubedyanganyi, Mfùmù wa Ditalala, Nzambi  
Mukolè n’Yéyè;  
Ùnsùngila, ùndama ku mpèkaatù yônsò ne ku  
bundù,  
Mukèmeshanganyi ki Mupikudi wanyì, Dînà  
Dyèndè dìtumbè!  
Kale mvwa mujimìnè, mpindyewu ngààpetèkì,  
musùùlula ku dipìila,  
Yesù ùdi ùfila budishikaminyi ne lupàndu mu  
kaabujimà;  
Ùnsùngila, ùndama ku mpèkaatù yônsò ne ku  
bundù,  
Mukèmeshanganyi ki Mupikudi wanyì, Dînà  
Dyèndè dìtumbè!

Bantu bônsò!

Mukèmeshanganyi, mukèmeshanganyi, ki cìdì  
Yesù bwànyì mêmè,  
Mubedyanganyi, Mfùmù wa Ditalala, Nzambi  
Mukolè n’Yéyè;  
Ùnsùngila, ùndama ku mpèkaatù yônsò ne ku  
bundù,  
Mukèmeshanganyi ki Mupikudi wanyì, Dînà  
Dyèndè dìtumbè!

<sup>232</sup> Mpindyewu twàmbààyi ne: “Mukalenge àtumbè!”  
“Mukalenge àtumbè!” Kanwènaayikù nudiyùmvwa  
bakezùdìibwe anyì? Nudyùmvwa bilenga anyì? Kuukwilaayaaku  
Mukalenge. Yéyè’s mmulenga wa dikèma.

<sup>233</sup> Nzambi ànùbènèshè too ne pangààtwìlanganà neenù  
cyàkàbidi. Nêmpingajilè mpindyewu mwanèétù wa balüme  
mulombodi, bulombodi bwà disangisha.



*MUDIMU MWOWELA BYANZA MUMANYISHIIBWE WÀ NZAMBI* LUA64-1205  
(The Identified Masterpiece Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu disambòmbò dilòòlò, dýà matùkù 5, à ngondo wa dikumi ne mwibidì, cidimu cyà 1964, bwà didyà dýà Bwobùmwè bwà Beena Kantu ku byanza bàà Èvànjeelìyò mu Kaabujimà ku Cilaala beenyi cyà Stardust mu Yuma, Arizona, U.S.A. Ndyumusha pa mukaba wa mèyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)